

左
海
經
辨

金壇段懋堂先生書

甲子三月

玉裁頓首恭甫先生閣下自壬戌年得奉教益直至於
今每深馳想先生人品經術皆不作第二流人

聖心簡在慰天下重望弟已老甚所仰霖雨蒼生也比
來大著能見示一二否臧西成人都因便布請福安西
成言學其推尊者惟先生雅有水乳之契相晤之樂可
知也伏惟雅鑒不一一玉裁頓首

又 癸酉十一月

辛年握手匆匆以爲大兄先生卽出就維揚之館相晤
不難也旣而知蘭陔色養講席卽設閩中無任馳溯海

內治經有法之儒爲吾兄首屈一指禮記鄭讀攷等書
尙未拜誦卽爲弟解紛之作亦未得一見兩年來著述
想甚富弟明年八十老至而耗及之不能殫精殊可歎
也未悉尙能相見劇談否在東已作古人厚民飢驅鹿
鹿茲因江子蘭沅之便肅侯侍奉近安子蘭與顧千里
蘇之二俊也寄吳弟段玉裁頓首

又

甲戌九月

恭甫大兄先生執事伏惟侍奉萬安興居多古今歲三
奉手札見賜五經異義疏證尙書儀禮諸經說一一盥
手雜誦既博既精無語不確如執事者弟當鑄金事之

以近日言學者淺嘗勦說騁驚獵名而已不求自得於中也大箸尙當細讀以求請益弟今年八秩終日飽食而已記一忘十甚可笑也安足以當執事之推許玉裁再拜

仁和嚴厚民識語

師於古今學術精識其淵源每辨一誼多發前儒所未及卽質諸許鄭二公知無以易吾師之說也庚午冬日受業嚴木識

左海經辨卷上

福州陳壽祺學

今文尙書大誓後得說

史記儒林傳曰秦時焚書伏生壁藏之其後兵大起流亡漢定求其書亡數十篇獨得二十九篇卽以教於齊魯之間壽祺謹案伏生尙書惟有堯典咎繇謨禹貢甘誓湯誓般庚高宗彤日西伯戡耆微子牧誓鴻範金縢大誥康誥酒誥梓材召誥浩誥多士毋劾君奭多方立政顧命鮮誓甫刑文侯之命秦誓凡二十八篇其一大誓非伏生所得也尙書正義一名引劉向別錄曰武帝末

民有得大誓書於壁內者獻之與博士使讀說之數月
皆起傳以教人文選注引七畧同且曰今大誓篇是也

見劉子駿移書讓太常博士注惟讀字作讀

劉歆移書太常博士亦曰大誓

後得博士集而讀之

漢書楚元王傳文選讀作讀

王充論衡正說篇

曰孝宣皇帝之時河內女子發老屋得逸易禮尙書各

一篇奏之宣帝下示博士然後易禮尙書各益一篇而

尙書二十九篇始定論衡言宣帝時與別錄七畧不合

蓋傳聞小誤趙岐孟子章句曰

滕文公篇

今之尙書大誓篇

後得以充學此五事者皆謂今文尙書者也尙書正義

又引後漢史獻帝建安十四年黃門侍郎房宏等云宣

帝本始元年河內女子有壞老屋得古文大誓三篇其
言畧同論衡而以後得大誓爲古文則不可信向歆充
岐皆無是言其曰博士讀說曰博士集而讀之曰下示
博士曰以充學則是今文無疑故七畧云今大誓篇孟
子注云今之尙書大誓篇言今以別於古也攷向歆領
校祕書在成帝河平三年然向生於昭帝始元元年傳年七十二卒後十三歲而王氏代漢推知之及宣帝甘露三年詔諸儒講
五經於石渠尙書則歐陽地餘林尊周堪孔霸張山拊
假倉皆歐陽高及兩夏侯弟子兩夏侯子政所與同朝
地餘諸人子政所與同議其上距武帝末不過數十年

間耳大誓之後出與否尙書家諸儒安有懵然罔覺者
子政奚至不稽事實遽以耳食者筆之於書哉卽子駿
方移讓博士豈能以虛誕之詞關其口耶吾是以信而
歆而決伏生書之無大誓也然則史記何以言伏生得
二十九篇也孔穎達謂司馬遷見太誓出而得行入於
伏生所傳內故總云伏生所得不復曲別分析非也遷
旣見大誓後出矣追述伏生何得不還其舊而以後冒
前以無爲有是穎達誣遷又使遷誣伏生也烏乎可且
夫伏生今文惟有歐陽大小夏侯三家穎達所謂入於
伏生所傳內者歐陽之經耶夏侯之經耶漢書藝文志

尚書家經二十九卷班固自注曰大小夏侯二家歐陽經

三十二卷卷卽篇也

間徵君若璩尚書古文疏證惠徵君棟古文尚書攷王光祿鳴盛尚

書後案从引漢志作歐陽經三十一卷余徧檢

武英殿本明南北監本正文盛本皆作三十二卷惟汲古閣

本作二十二卷上二字誤脫一筆玉海卷三十七引漢志正作歐陽經三十二卷

歐陽受經前

於夏侯武帝初先立學遷欲以當時見行書併歸伏生

所得則宜依歐陽經言三十二篇矣何以減之爲二十

九也若兩夏侯經自甘露以前未嘗立學官也遷傳儒

林攷六藝之文胡於伏生本經追述旣疎而取後來附

益者以溷之又舍學官肄業之書不據而反據未立學

官之本也不亦僞乎近江處士聲又謂遷據古文家分

顧命爲康王之誥實二十九篇遂云伏生得二十九篇
亦不得其說而遷就以求合者也愚以爲惟朱檢討葵
尊以百篇之序當其一者得之特其說未詳耳菽文志
曰書之所起遠矣至孔子纂焉上繼於堯下訖於秦凡
百篇而爲之序秦燔書禁學伏生獨壁藏之是伏生壁
中書有序也尙書引序各冠篇首出枚頤本古書序皆
總爲一篇置卷末今所存逸周書猶可見

漢志周書七十一篇今按

逸周書篇目自度訓至器服止七十篇其一篇卽卷末之序也

桓譚新論云古文尙書

舊有四十五卷爲五十八篇

見太平御覽卷六百八十五海卷四十二引脫下五字

而菽文志載尙書古文經四十六卷新論合二十九卷

及逸篇十六卷除序數之菀文志併序數之著錄從其

實也

經典釋文於彙佚末亦云馬鄭之徒百篇之序總爲一卷

古文如是今文度亦

宜然且尙書正義引史記云伏生得二十九篇下卽云
由此劉向作別錄因同於史記是別錄亦言伏生得二
十九篇也使伏生得二十九篇已有大誓而別錄又記
後得大誓乃始讀說傳教何自矛盾若是故惟以伏生
得二十九篇併序數之而無大誓則其孕直矣

問者曰漢書菀文志云孔安國得古文尙書以考二十
九篇得多十六篇二十九篇謂今文尙書也古文但多
十六篇則二十九篇中有大誓儒林傳云伏生求得二

十九篇又云東萊張霸分析合二十九篇以爲數十又采左氏傳書序爲作首尾則序在二十九篇外矣故尙書正義直云伏生二十九篇而序在外

正義卷一

今子謂伏

生二十九篇併序不併大誓於漢書之文前後焉可通乎答曰永嘉之亂三家尙書已亡孔穎達嘗見漢石經尙書拓本其云伏生二十九卷而序在外似據石經卽如是要是夏侯之本後增大誓者而誤牽伏生不免於所譏史記不復曲別分析者轉自蹈之矣史記傳二十九篇者從其朔之詞也伏生本經有序無大誓者也漢書傳孔安國考二十九篇張霸分析合二十九篇者班

氏追敘之詞也。謂夏侯經二十九卷之本，增大誓而序

在外者也。

史記儒林傳但云孔氏有古文尚書，安國以今文讀之，因以起其家。逸書得多十餘篇，皆

未明言。今古文篇數則云考二十九篇者，審爲班氏追敘之詞。第班氏於伏生求得

二十九篇，徒襲史記之文而失述，得大誓，顛末遂使伏

生所傳與夏侯等所增併爲一詞，蓋固之疎而非遷之

過也。曰史記周本紀齊太公世家，載今文大誓，近二

百言，而儒林傳何亦不言得大誓事。與曰史記網羅極

博，周本紀齊世家自載後出之大誓，儒林傳自舉伏生

之併序二十九篇，豈相盪也。且如湯征一篇，非孔氏古

文逸十六篇中所有，而殷本紀錄其文，亦將反以病遷。

乎哉

曰董仲舒傳對策引書曰白魚入于王舟有火復于王
屋流爲鳥周公曰復哉復哉顏師古注云今文大誓之
詞是時元光元年

武紀

大誓未出仲舒得引之何也答曰

仲舒春秋繁露同類相動篇引尙書傳周公曰茂哉茂
哉天之見此以勸之也恐恃之蓋說大誓之文而對策
引書作復哉復哉復茂聲同而字異引書旣與尙書傳
不符則非據今文尙書矣案史記周本紀白魚躍入王
舟中索隱云此以下至火復王屋爲鳥皆見周書及今
文大誓

唐人以枚頤本泰誓爲古文以馬鄭本之大誓爲今文顏師古李賢司馬貞皆然索隱又誤以

史記之流為鳥為古文

文選注引周書武王觀兵于孟津諸侯皆

曰帝紂可伐矣武王曰女未知天命未可也乃還師

通幽

賦又引周書曰武王將渡河中流白魚入于王舟王俯

取出涖以祭不謀同辭不期同時一朝會武王于郊下

者八百諸侯

任彥升為范尚書議吏部封侯表注

此文皆與大誓同尚書

正義引梁武言本有兩大誓古文大誓伐紂時事聖人

取為尚書今文大誓觀兵時事別錄之以為周書梁武

雖不辨古文今文之真偽然言周書以別尚書則是大

誓文具見逸周書今亡之矣又藝文類聚

卷九

引尚書

中候說赤鳥白魚事

周太子發渡孟津有火自天止于王屋為赤鳥又曰有火自上復于

王屋流爲鳥其色赤其聲魄又引武王發渡于孟津中
流白魚躍入王舟王俯取魚長三尺有文王字太平御
覽皇王部九羽族部七引畧同皇王部引流爲其文多
赤鳥下有五至以穀俱來六字亦與大誓合

同大誓左氏傳襄公二十五年及徐幹中論法象篇引逸
周書慎始而敬終終以不困潛夫論救邊篇引凡彼聖
人必趨時皆但稱書漢魏人引書緯亦偶書然則仲舒
對策引書安知非據逸周書與尙書中侯何必大誓也
前乎仲舒者漢五年婁敬說高祖已偁武王伐紂不期
而會孟津之上八百諸侯皆曰紂可伐矣史記劉敬傳是時
伏生壁中書且未出况大誓耶蓋大誓之文往往散見
傳記久矣曰尙書大傳曰周書自大誓就召誥而盛於

洛誥

見儀禮經傳通解續卷二十九

又曰孔子曰六誓可以觀義

因學紀聞

太平御覽引尙書大傳惟四月太子發上祭于畢至羣

公咸曰休哉凡九十字

御覽皇親部十二

又引武王伐紂至化

爲赤鳥三足凡二十一字

御覽居處部九

又引惟丙午王逮師

至前歌後舞凡十七字

御覽人事部一百八

皆不偁書曰而其文

於見大誓

見史記周本紀漢書律厯志尙書堯典毛詩大明思文等正義

非伏生書有

大誓與曰大傳惟四月以下文旣不偁書曰且其詞甚

長此傳引經亦無是體尙伏生經有其文傳錄之何爲

繁而不殺乎蓋伏生於大誓記其殘簡逸文因以爲說

耳抑余又案鄭康成尙書大傳序曰張生歐陽生從伏

生學生終後數子各論所聞以已意彌縫其闕別作章句又特撰大義因經屬指名曰傳

玉海卷三十七引中興書目

是大

傳與章句並出伏生之後也兩夏侯章句勝建所著

見本

傳歐陽章句釋文序錄云歐陽高始爲之攷菰文志錄

大小夏侯章句解故而其先張生無書則歐陽章句亦

當出於子陽不出和伯

冊府元龜卷六百六注釋類與釋文序錄同劉昭注續漢志解

六宗引歐陽說稱和伯非也又後漢書徐防傳注引應劭漢官儀云光武中興書有歐陽和伯夏侯勝建亦誤

復攷說文弟十四下夙部檮字解曰歐陽喬說檮猛獸

也文選西都賦注引歐陽尙書說同檮作螭此釋今文

牧誓如豺如檮之詞也

史記周本紀載牧誓檮作離檮正字離螭通借字歐陽

喬卽歐陽高喬局形聲義三者皆近通此高作歐陽章
句之證是章句又出於張生歐陽和伯後也鄭君以作
章句與作傳並言然則大傳亦多後來遞增者矣賴達
已疑書傳有八百諸侯俱至孟津白魚入舟之事不知
爲伏生先爲此說爲大誓出後後人加增此語今稽覈
之則大傳傳大誓者或由歐陽高等增附其說猶所謂
各論所聞以己意彌縫其闕之例未可執是斷伏生已
得大誓也曰然則三家尙書增大誓孰先答曰大誓之
合於伏生尙書其始於歐陽氏乎案武帝建元五年置
五經博士書惟有歐陽

見儒林
傳贊

武帝世尙書博士見於

史者有孔安國

史記孔子世家安國為今皇帝博士

歐陽高

漢書儒林傳

考兒

寬詣博士受業孔安國

兒寬傳

後授歐陽生子世世相傳

至曾孫高為博士則高為博士在安國後也高伏生六

傳弟子夏侯勝伏生五傳弟子勝為博士在昭帝世則

向歆所言武帝末之尚書博士得非歐陽子陽乎當時

既以大誓付博士讀說立於學官即合入伏生書矣况

歐陽經獨三十二卷今文家顧命不分

尚書音義馬融注康王之誥云

王若曰以下歐陽大

小夏侯同為顧命殷庚亦不異卷其三十二卷是於

伏生經文及序二十九篇外增以後出之大誓三篇明

矣夏侯勝宣帝時卒年九十計得親見大誓之出傳稱

其又從歐陽氏問從子建又師事歐陽高左右采獲歐陽旣增大誓立於學官故兩夏侯亦從而增入其書特併大誓爲一篇而除序不數故仍爲二十九篇以合伏書篇數之舊與歐陽小異所以然者豈非緣大誓後出而序非經文故可各以意增減卷數耶否則三家之經同出伏生安有多寡參差若此者哉

或又曰藝文志言得古文別錄言得大誓並在武帝末則是一時一事所謂得於壁內卽指壞宅得書所謂博士讀說數月皆起卽指安國讀古文以起其家之事兒寬受業安國又以授歐陽生子故歐陽經三十二卷正

由寬以所受於安國之大誓三篇錄入也大小夏侯之學出於張生張生未嘗就安國讀大誓故大小夏侯經二十九卷與伏生所傳同與歐陽異此三家經皆併序數之惟歐陽多大誓三篇耳答曰藝文志述共王得古文尙書論語孝經系之武帝末劉歆移書大常博士袁宏後漢紀建初八年卷十皆云武帝世論衡佚文篇云孝武皇帝封弟爲魯共王共王壞孔子宅以爲宮得佚尙書百篇其言封魯之時及百篇之數雖乖而亦言得書在武帝世漢書景十三王傳共王初好治宮室壞孔子舊宅以廣其宮於其壁中得古文經傳初好治宮室

者約畧追述之詞近論古文者以詞害意遂謂共王初
卽景帝初轉摘執文志爲誤非也但攷共王以孝景前
三年徙魯二十六年薨當孝武元光六年不得至武帝
末執文志亦約畧追述之詞包安國獻古文事統言之
如劉歆移書上云孝武皇帝之時次云大誓後得其下
追述故詔書稱曰禮壞樂崩書缺簡脫朕甚閔焉此詔
在元朔五年見武帝紀及儒林傳序時大誓未出而共
王已薨矣其下乃又更端追述共王得書安國獻書事
古人文章錯綜每如此要之獻古文與獻大誓雖同在
武帝世而得之也實非一時一事如欲併歸安國所得

則志當言安國得逸書十七篇何以止言十六也藝文志卽本之七畧七畧何以一事岐出也安國所獻古文

合二十九篇及逸十六篇遭巫蠱之難皆未施行

藝文志儒

林傳劉歆移書太常博士並同何以大誓獨得充學也兒寬詣博士受

業安國後以射策爲掌故功次補廷尉文學卒史時張湯爲廷尉在元朔三年就寬之年事逆計安國爲博士當在武帝初而得大誓在武帝末則不得謂歐陽經有大誓由兒寬以所受於安國者錄入也卽如其言而儒林傳固云歐陽大小夏侯學皆出於寬何知歐陽經錄大誓而兩夏侯經不錄猥謂夏侯之先張生未嘗就安

國讀大誓故耶漢書論衡傳二十九篇皆指夏侯經增
大誓者若歐陽經不得傳二十九也倘夏侯經不錄大
誓則漢書之安國考二十九篇張霸分析合二十九篇
論衡之尙書益一篇而二十九篇始定皆何以言之漢
書敘傳班伯引書云廼用婦人之言師古注大誓之詞
也伯受經於鄭寬中傳小夏侯之學而引大誓謂夏侯
經不錄大誓可乎

曰今文之增大誓既聞命矣馬融書序曰大誓後得案
其文似若淺露

尙書正義卷十二又卷一

鄭康成書論云民間得大

誓

尙書正義卷一王肅云大誓近得非其本經

尙書正義卷十二

三家

皆傳古文者而疑大誓將古文亦本無大誓與大誓正
義云東晉李長林尚書集注於大誓篇每引孔安國曰
又何也答曰藝文志言安國得古文尚書以考二十九
篇得多十六篇則大誓在古文內矣劉向別錄於古文
尚書云五十八篇尚書正義卷二向在祕府親見古文古文無
大誓別錄不應言五十八篇也說文解字孔氏皆古文
弟三支部引周書曰孜孜無怠弟十一水部引周書曰
王出渰弟十二手部引周書曰師乃摛皆在大誓則孔
壁古文有大誓信矣且古文大誓固與今文不盡同如
古文流爲雕今文流爲鳥周本紀索隱云按今文泰誓
流爲雕雕驚鳥也馬融云明

武王能伐紂毛詩思文正義引鄭氏云古文師乃摛當為雅雅鳥也索隱誤以馬鄭本為今文

今文師乃摛傳見御覽四百六十七引尚書六蒼兕史記

別本作蒼雉齊世家索隱疑亦蒼兕古文尚書作蒼兕蒼雉

今文也史記載大誓皆今文今本作蒼馬鄭尚書之大

誓自是安國所傳之舊康成雖云民間得大誓而無疑

詞鄭或亦指今文同於別錄七畧而馬融王肅不察向

歆之言直以後得今文大誓為古文亦過矣若夫安國

之注古文大誓它書絕無所徵史記漢書皆不言安國

注尚書豈獨為大誓作訓案劉孝標世說新語注卷一

引續晉陽秋曰孔安國字安國會稽山陰人車騎掾第

六子也以儒素見稱歷侍中太常尙書遷左僕射特進
卒宋書二十禮志太元十三年召孔安國爲侍中晉書
禮志隆安四年尙書左僕射何澄右僕射王雅尙書車
府孔安國祠部郎徐廣議孝武太皇太后李氏服宋書
卷十六禮志通典吉禮又引孔安國議禘祫殷祭通典
凶禮晉孔安國問徐邈皇太子爲新安公主服見通典八十二
是東晉時別有一孔安國亦通經學李長林東晉江夏
太守見釋文序錄封樂安亭侯隋書經籍志易類宜與此孔安國同
時故得引其說而穎達誤以爲漢之孔臨淮遂無能辨
之者

今文尙書有序說

或難壽祺曰子詢伏生二十九篇併序而不併大誓辨
矣然今文尙書有序與否衆竊惑焉漢書楚元王傳劉
歆移書太常博士云抑此三學以尙書爲備臣瓚注云
當時學者謂尙書惟有二十八篇不知本有百篇也似
今文無百篇之序故爲今學者不知有百篇又書序殷
庚爲三篇顧命康王之誥爲二篇如伏生書有序何不
分殷庚顧命以遵書序顧皆合爲一篇使經與序兩不
相應也戴庶常震嘗言序爲伏書所無見文集古今王
光祿鳴盛嘗言書序亦從屋壁中得見尙書意其然乎

答之曰劉歆班固荀悅漢紀

卷二十五
河平三年

袁宏後漢紀

卷十

二建初
八年

並言孔子宅所得古文尙書多十六篇百篇之

序同出於孔壁尙亦伏書所無諸家言古文得多者何
得不一及之也歆所譏以尙書爲備者當時學者黨同
妒真之詞彼非果不知尙書有百篇也伏生故爲秦博士
論衡正說篇云伏生抱百篇藏于山中此非未嘗肄業
及之者尙書大傳篇目尙有九共帝告嘉禾驟命拊誥
諸逸書之名

見玉海卷三十七
及藝文志考證

爲今學者卽未見書序

寧皆不讀大傳竟不知二十八篇之非全書耶臣瓚之
說蓋本孔叢子孔叢連叢下篇載臧與從弟安國書云

襄爲今學唯聞尙書二十八篇取象二十八宿何圖古文乃有百篇按此書出魏晉間人臣瓚驟見而爲所惑因傳會之以爲治今文者不知本有百篇然蘇林注漢書但曰備之而已說絕與臣瓚異林仕於魏黃初中未見僞孔臧書故也古書每篇之首自有題目如帝典湯誓仲虺伊訓太甲般庚兌命高宗大誓武成康誥君陳君雅甫刑秦誓之屬見於羣經其來已久百篇之序所以依此排比古文尙書殷庚分爲三顧命康王之誥分爲二是矣今文尙書觀秦近君說堯典篇目兩字至十餘萬言

見漢書藝文志注引桓譚新論秦近君志作延君名恭

是亦每篇必有題

目其殷庚三篇據隸釋卷十四載蔡邕石經尙書殘碑
殷庚中篇之末建乃家下空一字始接下篇經文知上
篇之末亦然足今文殷庚卷中未嘗不分別特同卷相
次總爲一目析言三篇可也通言一篇亦可唯康王之誥
則不應同爲顧命以違書序卽謂今文無序然使篇目
具存伏生安得刪除之而併合之嘗揣其故藝文志言
劉向以中古文校歐陽大小夏侯三家經文酒誥脫簡
一召誥脫簡二率簡二十五字者脫亦二十五字簡二
十二字者脫亦二十二字脫字數十是今文有脫簡脫
字也尙書初出屋壁朽折散絕多矣

劉歆移讓太常博士書云康王

之詰意必偶脫篇目伏生徒見王若曰以下經文與顧
命經文相承首尾貫弗牽連傳寫雖其次有書序可按
而篇目既失伏生或守其舊而不改或年既昏耄忘其
兩篇起訖之界疑莫能分遂合爲一耳豈肯任意割裂
若僞孔妄分王出在應門以下爲康王之詰哉然則今
文篇數之分不分曷關於有序無序哉雖然所謂今文
尙書有序者尙未有以質實也今討論經典請立十有
七證以明之藝文志尙書家歐陽經三十二卷按伏生
經文二十八篇增大誓三篇止三十一卷其一卷必百
篇之序也西漢經師不爲序作訓故歐陽章句仍止三

十一卷矣

詩書之序至馬鄭始爲之注毛詩篇首正義云毛傳不訓序是漢初治經者未有爲序作

訓者也或曰夏侯經二十九卷章句亦二十九卷歐陽何

以不然曰漢初爲傳訓者皆與經別行

見毛詩篇首正義

以班

志覈之六藝家傳訓卷數多寡往往不與經符如詩經有序於尙書最爲近乃魯齊韓詩皆二十八卷惟魯說齊孫氏傳卷與經合而魯故齊孫氏故齊后氏故后氏傳韓故韓內傳韓說卷皆與經異毛詩二十九卷而毛詩故訓傳卷亦與經異齊詩有序無序無以明之魯韓毛之詩皆有序而傳訓卷數參差若是於歐陽夏侯之書乎何疑今文有序其證一矣班固僞司馬遷從孔安

國問故遷書載堯典禹貢微子洪範金縢多古文說固
言如此則遷書五篇之外蓋多取今文矣史記載尙書
逸篇惟見湯征湯誥湯征又在古文逸十六篇外餘絕
無聞獨於書序臚舉十之八九至于序作原命爲太戊
贊伊陟于廟言弗臣伊陟讓序作殷庚爲五遷無定處
殷民咨胥皆怨又言小辛立殷道復衰百姓思殷庚序
作高宗彤日及高宗之訓爲武丁祭成湯事又言祖庚
立祖已嘉武丁之以祥雉爲德立其廟爲高宗

漢書律
疏志載

劉歆三統厯文引書序曰惟十有一年武王伐紂大誓
諸侯八百會以此爲觀兵時事下又引序曰一月戊午
度于孟津以此爲十三年事與史記及今書序不合鄭
康成書注說同劉歆蓋古文家說也今書序或失其舊

序作洪範爲武王克殷後二年序作藥命爲穆王閔文武之道缺乃命伯藥申戒太僕國之政序文侯之命爲襄王使王子虎命晉文公序作秦誓爲穆公封殽尸後事又序夏社在典寶後序咸有一德在成湯時以太甲爲太甲訓以伊陟爲太戊以分器爲分殷之羣物以康王之誥爲康誥其他女房爲女方大垌爲秦卷仲虺爲中鬻遷蹕爲遷陔圯于耿爲遷于邢升鼎耳爲登鼎耳鬻爲飢歸獸爲行狩異畝爲異母歸禾爲餽禾旅天子命爲魯天子命無逸爲母逸肅慎爲息慎俾榮伯爲賜榮伯伯罔爲伯藥某誓爲獮誓呂荆爲甫荆說義文字

往往與古文異則顯然兼取之伏書也且尙書古文今

文之序或同或否師傳則然如韓詩之序可考者關雎

刺時也晁氏詩說芣苢傷夫有惡疾也文選辨命論注漢廣悅人也

文選七教注汝墳辭家也後漢書注蟋蟀刺奔女也同鷄鳴譏人

也太平御覽夫移燕兄弟也晁氏詩說賓之初筵衛武公飲酒悔

過也後書漢注與毛詩序互有同異此今古文書序異同之

例也今文有序其證二矣論衡佚文篇曰東海張霸通

左氏春秋案百篇序以左氏訓詁造作百二篇漢書儒

林傳曰張霸分析合二十九篇以爲數十又采左氏傳

書序爲作首尾凡百二篇成帝時求治古文者霸以能

爲百兩徵以中書校之非是夫霸所分合者夏侯經二十九篇其所采書序卽出今文非古文也何言之孔氏古文天漢後獻遂祕于中外不得見二句本論庸生孤衛正說篇傳衰微特甚霸但見今文有百篇之序而不見孔書故竊之作百兩篇以欺世如所采書序出古文是霸見孔壁之本矣豈不知孔氏古文天子自有中書可校而敢更作之而遽獻之於朝哉且霸見孔壁之本則見其中逸書二十四篇攬拾較易乃不并取以爲百兩篇而轉取左氏傳何哉故知霸所取書序出今文也今文有序其證三矣孔穎達尙書正義曰伏生二十九卷而序在

外見正義

夫二十九卷而序在外者夏侯之書非伏生

元本也然言有序則可信按隋書經籍志唐書藝文志

皆載一字石經尙書六卷又云相承傳拓之本猶在祕

府則唐人於拓本漢石經尙書及見之也穎達謂今文

則夏侯歐陽所傳及蔡邕所勒石經是故於堯典篇首

正義嘗引石經其云二十九卷而序在外者必見石經

尙書有百篇之序故爲是言耳今文有序其證四矣歐

陽大小夏侯尙書亡於永嘉之亂

見隋書經籍志

今無可攷請

以尙書大傳徵之周書成王政序曰成王東伐淮夷遂

踐奄尙書音義曰踐尙書大傳云藉也詩豳風破斧正

義引書傳云遂踐奄踐之者籍之也籍之謂殺其身執其家豬其宮按將蒲姑序言成王踐奄遷其君于蒲姑是奄君猶存書傳謂殺其身此今文說之異蓋書傳體近韓詩外傳往往旁臚異聞非盡釋經然而遂踐奄三字則明出于成王政之序今文有序其證五矣周書亳姑序曰周公在豐將歿欲葬成周公薨成王葬之于畢告周公尙書大傳曰周公致政封魯三年之後老于豐心不敢遠成王而欲事文武之廟周公疾曰吾死必葬于成周示天下臣于成王周公薨成王欲葬之于成周天乃雷雨以風禾盡偃大木斯拔國人大恐王與大夫

開金縢之書執書以泣曰周公勤勞王家子幼人弗及

知乃不葬于成周而葬之于畢示天下不敢臣也

漢書梅福

傳注儒林傳注後漢書張書傳言葬周公事本於毫姑

序也論衡感類篇引書乃得周公死自以為功代武王

之說蓋古文所字今文作死形近致譌故以金縢之事

與毫姑之事聯為一也今文有序其證六矣然難者猶

謂與書序有兩端也大傳又曰武丁祭成湯有雉飛升

鼎耳而雉

見御覽卷八十三

此出商書高宗彤日之序也今文

有序其證七矣大傳又曰成王在豐欲宅洛邑使召公

先相宅此述周書召誥之序也其下即述經文云六月

乙未王朝步自周至于豐惟太保先周公相宅

見御覽卷二百

六帖載鄭注云太保召公先周公視洛邑也

今文有序其證八矣犬傳又曰

夏刑三千條

見長孫無忌唐律疏義

此本周書甫刑之序也甫刑

序曰穆王訓夏贖刑作呂刑案經曰五刑之屬三千不

言夏呂氏春秋孝行覽云商書曰刑三百罪莫大于不

孝亦不及夏左氏傳曰夏有亂政而作禹刑

昭公六年雖言

夏刑而不舉其目若非見書序訓夏贖刑之文何以知

三千條爲夏刑也今文有序其證九矣犬傳篇目有九

共帝告藥命序又有嘉禾揜諸此皆在二十九篇外若

非見書序何以得此篇名也今文有序其證十矣書傳

既有明文請更徵之白虎通白虎通引尙書悉用今文

家說誅伐篇傳尙書序曰武王伐紂紂御覽卷三百此

周書大誓序及武成序之文也紂古文尙書其引尙書用

今文則序亦出之今文無疑今文有序其證十一矣漢

書孫寶傳平帝立寶爲大司農孔光馬宮等咸稱王莽

功德比周公寶曰周公上聖召公大賢尙猶有不相說

若干經典此引周書君奭之序也攷儒林傳平帝時立

古文尙書王莽傳元始四年益博士員而寶爲大司農

在元始二年百官公卿表數月免是時古文未立寶受公羊顏氏

春秋於筦路見儒林傳成帝初以明經爲郡吏本傳御史大夫張忠辟爲

屬史記將相名臣年表漢書百官公卿表並云建
始四年忠爲御史大夫故知實爲郡吏在成帝初亦非
爲古學者則其所誦之經亦今文也古文毛詩平帝已
立而康成注禮時尙未之見則孫寶之不見古文尙書
不足疑也今文有序其證十二矣後漢書楊震傳曾孫
彪議遷都曰殷庚五遷殷民胥怨此引商書殷庚之序
也彪世傳歐陽尙書所據乃其本經今文有序其證十
三矣法言問神篇曰易損其一雖蠢知闕焉至書之不
備過半矣一習者不知惜乎書序之不如易也按楊子
雲引書皆用今文書不備過半唯今文爲然若古文則
前漢存者五十八篇不得云爾今文有序其證十四矣

法言又曰古之說書者序以百而酒誥之篇俄空焉今
亡矣夫按酒誥惟今文有脫簡故其言如此今文有序
其證十五矣論衡正說篇駁或說尚書二十九篇法斗
七宿曰按百篇之序闕遺者七十一篇獨爲二十九篇
立法如何論衡此篇所引或說乃今文家言其駁誥亦
據今文爲說若古文則案百篇之序二十九篇外尚有
逸書二十四篇不得云闕遺者七十一篇今文有序其
證十六矣杜預春秋左傳後序曰紀年稱伊尹放太甲
於桐乃自立也伊尹卽位於太甲十年太甲潛出自桐
殺伊尹此語大與尚書序說太甲事乖異不知老叟之

伏生或致昏忘將此古書亦當時雜記未足以取審也
詳預此言首以書序爲出自伏生預時三家尚書見存
目驗援據致爲明確今文有序其證十七矣稽合十有
七證彰彰如是其足以決三家尚書之有序與否觀者
豈猶不自悟耶夫三家尚書有序則伏生所得不得謂
無序伏生所得有序而大誓乃後出則伏生二十九篇
不得不以百篇之序當其一吾故曰伏生二十九篇併
序不併大誓也

今文尙書中有古文

伏生所藏壁中尙書不知何體書其教於齊魯之間及
鼂錯從受當寫以隸然伏生爲秦博士秦廢古文用八
體書則伏生尙書宜亦有兼存古文小篆者故如叶時
月尙書大傳不叶于極見困學紀聞叶用五紀漢書五行志引叶當作叶
泉魚史記夏本紀彛命史記周本紀○漢藝文志考證尙書
引周書曰伯彛古文彛古文問字彛祇厥敘後漢紀建
案說文此條上古文二字應行
年旁施象刑白虎通旁告無辜于天論衡卷十五變動
方爲建用王極續漢五行志注引尙書大傳皇作王此
皆古文之未改者也段君若膺不察而于方旁二字亦

云凡古文尙書作方凡今文尙書作𠂔自知與儀禮乖
違復臆決之曰儀禮則人又爲方尙書則今文爲𠂔斯
自相矛盾矣

今文三家尙書自有同異

世皆知今文尙書與古文尙書有同異不知今文三家

又自各有同異古文平章百姓尙書大傳則作辯章百

姓今文也又作便章見史記五帝本紀古文堯夷

說文土部

尙書正義卷二引夏侯等書則作嶠鐵史記夏本紀索

隱引今文尙書及帝命驗作禺鐵經典釋文引考靈耀

及史記作禺錢皆今文也又作郁夷史記五帝紀如此

古文湯谷五帝紀索隱引史記舊本則作湯谷淮南子

曰日出湯谷浴于咸池今文也

今本淮南子作暘谷與索隱所引異蓋傳寫誤

依尙書改之又作暘谷說文第九山部暘解云一曰嶠錢暘

谷也古文平秩周禮馮相氏疏引尙書大傳則作辨秩
東作辨秩南僞辨秩西成今文也又作便程東作便程
南爲便程西成見五帝紀古文平在朔易尙書大傳作
辨在朔易今文也又作便在伏物見五帝紀及索隱引
大傳亦然古文訛谷後漢書崔駰傳作疇谷今文也又
作訓谷見隸釋劉寬碑古文盟豬漢書地理志史記夏本紀
則作明都今文也又作孟諸索隱云尔疋左傳謂之孟
諸今文亦爲然今案初學記政理部三引尙書大傳孟
諸靈龜是伏生尙書作孟諸也古文在治留以出入五
言漢書律厯志則引作七始訓以出入五言說字依隋志引改漢

志作詠
今文也又作來始滑以出入五言見五帝紀來

始卽黍始之譌黍古七字形近來
又作采政忽見索隱

偁今文古文曰弟亦作曰洩見徐廣傳史記一本說文

第六口部引商書則作曰圉今文也
詩齊風箋古文古

文曰蠱亦作曰柔尙書正義引鄭王本皆然
周禮大卜

此史記宋微子世家則作曰霧
說文作霰從雨致聲徐

史記亦今文也
漢書後漢書五行志並引洪範五行傳

引洪範五行傳作霽亦非說文霽地氣發天不應曰霽霽晦也

從雨霽聲
又作曰被見徐廣舉史記一本它如五玉漢

書郊祀志作五樂夔尙書中候作歸
見太平御前師乃

鼓鼗譟

見周禮大司馬注
引書蓋大誓文

後漢書劉陶傳武旅有鳧藻

之士杜詩傳士卒鳧藻鳧藻卽鼗譟之異文蓋歐陽大
小夏侯傳習之本容有不齊猶今詩有魯齊韓今春秋
公羊有嚴顏雖共出一師猶不能無稍岐互要以各尊
所聞彌縫其闕苟通厥指何必論甘忌辛觀馬鄭並治
古文而傳本之字多異學者亦可以見其嘖而觀其會
通矣

今文尙書亦以訓詁改經

史記多以訓詁改經文學者所知也今文尙書亦有然

者如內之爲入內古文寅餞內日尙書大傳云寅餞入

日出內五言史記夏本紀云出入五言說文內入也或之爲

有時亦罔或克壽論衡氣壽篇後漢書鄭崇傳引云時

亦罔有克壽鄭君論語注或之言有也達之爲通用克達殷卽大命

蔡邕石經作用克通殷就大命史記夏本紀達于河達

于沛達于荷達于淮泗並作通字矜之爲憐爾疋矜憐撫掩之也

毛詩鴻雁傳矜憐也予惟率肆矜爾論衡雷虛篇引云予惟率夷

憐爾離之爲麗不離于咎尙書大傳云不麗于咎易象傳離

麗答之為對奉答天命尙書大傳云奉對天命此猶毛

詩芄蘭能不我甲毛傳甲狎也而韓詩即作狎字釋小

御是用不集毛傳集就也韓詩即作就字韓詩外傳六鴛鴦

摧之秣之毛傳摧莖也韓詩即作莖字釋文大明倪天之

妹毛傳倪磐也韓詩即作磐字釋文毛詩正義抑洒掃庭內毛

傳洒灑也韓詩即作灑字外傳卷六皆今學之以訓詁代經

者也

史記用今文尙書

史記始用書序採摭十之七八其說多異蓋今文家言也其所錄尙書亦以今文爲主雖班固稱遷書載堯典禹貢微子洪範金縢諸篇多古文說今以此五篇攷之如五帝紀之載堯典居郁夷曰柳谷徐廣云一作柳谷便在伏物黎民始飢五品不訓歸至于祖禰廟尙書大傳歸格于禰祖用特五流有度五度三居今文宅皆爲度夏本紀之載禹貢維箇箝徐注箭足杆說文竹部引維箇箝檮今文也木部引維箇箝枯古文也檮傳同紀之載洪範毋侮鰥寡尙書大傳同文字皆與今文昭合則所謂多古文說者特指其說義耳若文字固不盡从古

文也五篇而外所錄皆今文說可知

魯周公世家載金
滕周公卒後暴風

雷雨亦
今文說

不獨黎之作者流爲雕之作流爲鳥如熊如羆

之作如豺如離而已司馬子長時書惟有歐陽大小夏侯未立學官然則史記所據尙書乃歐陽本也

史記採尙書兼古今文

漢書儒林傳司馬遷從孔安國問故遷書所載堯典禹
貢微子洪範金縢諸篇多古文說段君若膺始辨漢人
援引尙書皆用見立學官今文之本遷書多古文說者
特其說義則然而文字仍悉依今文此論足以發千古
之覆矣然以史記所採五篇覈之實有兼用古文者如
肇十有二州不作兆尙書大傳作兆蟪珠泉魚不作玼璣說文第一
玉部玼重文蟪夏書玼從虫賓第八禾部引
虞書曰泉咎繇夏本紀索隱曰泉古璽字 維箇輅枯
說文第五竹部輅引夏書曰惟箇輅枯重文 不作輅枯
輅古文輅第六木部枯引夏書曰惟箇輅枯
蟠冢導濬不作漾說文十一水部漾重文漾注古文从養漢書地理志作養思曰審

不作客

尚書大傳作客漢五行志引經曰思曰容應劭曰容通也古文作客志下引傳曰思心之不客

客客者

不離于咎不作麗

困學紀聞引尚書大傳不麗於咎

曰悌不作

圉

詩齊風箋古文尚書以悌為圉

高宗饗國五十五年

五十五年亦與今本尚書異史記

富是古文說

不作百年

蔡邕石經高宗饗國百年

皆古文之灼然可

信者也遷非經生而好釣奇故雜臚古今不冒專守一

家魯周公世家載金縢其前周公奔楚事乃古文家說

其後成王改葬周公事乃今文說此其明證矣

漢書地理志載古文禹貢

漢書地理志載禹貢一篇與史記夏本紀文字大異史記用今文漢書用古文也孟堅序云采獲舊聞考迹詩書推表山川以綴禹貢周官春秋下及戰國秦漢焉班志本注於山川之蹟與禹貢相應無異議者則直僞禹貢證之如馮翊襄德下所引是也或有不言所徵而其文實據禹貢者如會稽郡丹陽郡分言南江北江中江是也知者南江北江中江之名舍禹貢無它徵也又如引桑欽六事亦不僞禹貢而實係古文尙書說是也如棗木嶽陽衡章沛河宅土厥中

說文第一中古文廼同維文或以爲艸字

留槃絲達于沛大埜既豬

說文十三里部野古文作埜

赤哉

禹貢釋文埜鄭

作哉徐鄭王皆讀曰熾韋昭音試釋文引韋說蓋出漢書音義是漢書本作哉顏師古本作埜非

夏狄

周禮染人注引禹貢同是鄭本古文作狄

泗潁泉魚適居篠簜

史記作竹史記今文

天沱灣內錫濤漢盟豬青黎

史記作青驪

西頤鄠水適同豬

樊渠叟倍尾

志江夏郡安陸橫尾山在東北古文以為倍尾山

嶠山道江適同

四奧既宅棐旅內總內錕內戛服所存古文最多

見說文

文者皆古文

左馮翊襄德引禹貢北條荆山右扶風美陽引

禹貢岐山宏農郡上雒引禹貢雒水河東郡濩澤引禹

貢析城垣引禹貢王屋北屈引禹貢壺口河南郡穀成

引禹貢潁水東郡東武陽下引禹貢潁水南陽郡平氏

下引禹貢桐柏廬江郡尋陽下引禹貢九江山陽郡湖
陵下引禹貢浮于淮泗達于荷沛陰郡下引禹貢荷澤
成陽下引禹貢雷澤鉅鹿郡下鉅鹿引禹貢大陸澤恒
山郡靈壽下引禹貢衛水上曲陽下引禹貢恒水泰山
郡萊蕪下引禹貢汶水桑欽所言蒙山下引禹貢蒙山
琅琊郡箕下引禹貢濰水東海郡祝其下引禹貢羽山
蜀郡下引禹貢桓水郫下引禹貢江沱青衣下引禹貢
蒙山湔氐道下引禹貢嶧山隴西郡氐道引禹貢養水
首陽引禹貢鳥鼠同穴臨洮引禹貢西傾山西下引禹
貢嶓冢天水郡冀下引禹貢朱圉山安定郡涇陽下引

禹貢涇水信都國信都下引禹貢絳水六安國安豐下
引禹貢大別山長沙國湘南引禹貢衡山以上地理志
所引禹貢凡三十三事又引古文十一事右扶風汧注
吳山在西古文以爲汧山雍州山武功注大壺山古文
以爲終南垂山古文以爲敦物潁川郡密高注古文以
密高爲外方山也江夏郡竟陵注章山在東北古文以
爲內方山安陸注橫尾山在東北古文以爲倍尾山東
海郡下邳注葛嶧山在西古文以爲嶧陽會稽郡吳注
具區澤在西揚州數古文以爲震澤豫章郡歷陵注傳
易山傅易川在南古文以爲傅淺原武威郡武威注休

屠澤在東北古文以爲豬埜澤張掖郡居延注居延澤
在東北古文以爲流沙十一事亦出禹貢則古文卽謂
古文禹貢甚明而倍尾傳淺原豬埜三事尤爲古文之
確證孟堅本注特加別識正以明此志前後徵引皆尙
書古文異於他篇所引皆今尙書也又沛陰郡乘氏下
言泗水琅琊郡朱虛下言汶水會稽郡吳下言南江在
南東入海毗陵下言江在北東入海丹楊郡蕪湖下言
中江出西南東至陽羨入海金城郡河關下言積石山
右北平郡驪成下言大揭石山遼西郡繁縣言揭石水
魯國卞下言泗水雖不脩所出案其文亦是據禹貢爲

說又上黨郡屯留下引桑欽言絳水平原郡高唐下引桑欽言潞水泰山郡萊蕪下引桑欽言汶水丹陽郡陵陽下引桑欽言淮水張掖郡刪丹下引桑欽言弱水中山國北新成下引桑欽言易水凡六事皆卽桑君長說古文尙書語而亦不偁禹貢者從可知也敦煌郡敦煌下又引杜林以爲古瓜州地此亦杜伯山說古文尙書語也惟平原郡鬲下一引平當以爲鬲津此必平當說今尙書禹貢九河語然則班氏引今尙書家與古文家說標識甚顯白矣其稱古文以爲者必古文先師說無疑古文家相傳述莫得其主名故不能如桑欽杜林之

直書其人也。不言尙書若禹貢者，上有所承省文也。若

通于河，通于淮、泗，易達爲通。傳寫偶亂，降水爲絳水。信

國信都下上則改讀始於桑欽。禹貢正義云：鄭以降讀爲共

河內共縣，淇水出焉，東至魏郡黎陽縣入河。北近降水也。周時國於此地者，惡言降水，改謂之共壽。棋案地理

志：上黨郡屯解班本注云：桑欽言絳水出。瑤瑱釋文

西南東入海，然則易降爲絳，自桑欽始也。江海釋文：治鄭本作

一王部：現重文，讀注現或从貫均。江海松當爲沿馬

文本作松馬从漢志改。則古文之或字，不足以一二致

疑。段氏若膺堅執，史記漢書引尙書悉用今文，遂以地

理志中之脗合古文者，盡斥爲後人改竄，並古文十事

明在禹貢者，亦強目爲今古之異，而謂非壁中之古文。

石海經辨

殆不可憑也

白虎通義用今文尙書

今所傳白虎通義非完書就四十三篇及它書所援闕

文考之凡引尙書無傳古文者逸書則傳尙書逸篇引

尙書大傳近十餘條攷黜篇引書曰三年一攷少黜以

地公羊傳隱公八年注三年一使三公黜陟疏云書似傳文又路史發揮卷五引大傳曰再細少以地

書傳文而字有脫漏否則書緯文漢人引緯多直傳爲

經紉冕篇引書曰黼黻衣黃朱紉疑卽今文顧命布乘

黃朱之異文其宗族篇解尙書以親九族爲父族四母

族三妻族二與歐陽夏侯符而不从古文家上自高祖

下至今孫之說見詩葛藟正義左傳桓六年正義引五經異義喪服篇解尙書

今天動威以彰周公之德下言禮亦宜之爲周公以王

禮葬與尙書大傳符

大傳文引見通鑑前編成王十一年又見漢書梅福傳注後漢書張

與傳注路史後紀卷十注又見後漢書周舉傳注引洪範五行傳

而不從古文家周公

奔楚之說

見史記魯世家論衡感類篇

然則白虎通引尙書悉用今

文家明矣或曰後漢書賈逵傳言肅宗立特好古文尙

書賈逵丁鴻皆治古文者與議白虎觀何以知其不兼

用古文也曰許叔重作五經異義於今尙書說古尙書

說必加別識肅宗旣好古文撰白虎通者儻用古文豈

無別識以著其異哉攷後漢書言肅宗好古文尙書左

氏傳建初元年嘗詔賈逵入講北宮白虎觀南宮雲臺

然是時帝特使發出左氏大義長於二傳者而已未及

尙書

達條奏左氏三十事則在元和二年據奏云改元正祿謂改建初九年爲元和元年及元和二年始

用四分

蓋達尤明左氏傳先已爲之解詁故也

見本建

初四年乃會諸儒於白虎觀講五經同異

肅宗紀

著白

虎通義

儒林傳序

達以校書郎與議其後乃詔撰集歐陽大

大小夏侯尙書及古文同異遷爲衛士令

案楊終傳詔諸儒於白虎

觀考論同異會終坐事繫獄校書郎班固賈逵袁之終又上書自訟即日貰出乃得與於白虎觀則是議白虎

觀時達方爲校書郎達傳言撰集三家尙書及古文同異遷爲衛士令明在議白虎觀之後矣丁鴻傳注引東

觀記言達以衛士令集議非也

又其後建初八年乃詔諸儒選高才生

受古文尙書當集議白虎觀時古文猶未用也丁鴻傳

年十三從桓榮受尚書

榮傳歐陽尚書

不言更受古文而楊倫

傳言師事司徒丁鴻習古文尚書按鴻爲司徒在安帝

永光四年鴻其晚治古文與集議白虎觀者尚書博士

止歐陽大小夏侯三家

見續漢百官志

諸儒則賈逵通大夏侯

尚書

逵傳以大夏侯尚書教授

丁鴻桓郁習歐陽尚書肅宗從郁受

經稱制臨決宗旨可知而鴻又以才高論難最明

本傳

白虎通於尚書悉用今文也逵鴻雖通古文尚書然逵

嘗習毛詩左氏春秋矣左氏春秋又嘗於建初元年入

講南北官矣乃白虎通所引詩傳並出魯韓而無一語

及毛詩

宗族篇引禮曰宗人將有事族人皆侍此必逸禮之文通典徑改作毛萇曰案詩湛露毛傳有

此語宗人作宗子然曰虎通凡引經傳例無直書人名者通典改之誤矣嫁娶篇引傳曰陽倡陰和男行女隨出易緯乾鑿度詩鄭風丰序云陽倡而陰不所引春秋和男行而女不隨與此稍異非毛傳文也傳並出公羊間及穀梁必別識之而無一語及左氏三占從二理勢則然其於尙書用今文猶是例也何疑焉

尙書亡逸篇說

仁和孫之騷輯尙書大傳召誥傳有大社惟松東社惟
柏南社惟梓西社惟栗北社惟槐五句按此文出白虎
通社稷篇偁尙書逸篇魏書及北史劉芳傳藝文類聚
太平御覽引並同則非書傳文明矣惟初學記及禮記
郊特牲正義作尙書無逸篇無字誤衍或當作亡謂尙
書篇數之亡逸者也古亡無通傳寫誤亡爲無白虎通
爵篇引書亡逸篇曰厥兆天子爵亦其例也今本尙書
大傳毋逸傳有此文乃後人綴緝者羣入江處士聲尙
書集注音疏堅執爲書無逸篇之佚句而以亡之與逸

二字有辨力。詆合稱亡逸者爲妄。段氏古文尙書撰異用其說。然則大社惟松五句。亦將緣初學記禮記正義之譌文入之尙書無逸篇乎。且尙書大傳無逸作毋逸。見困學紀聞卷二。不作無字。編考諸書未有載尙書大傳引毋逸佚句者。此何據也。余友高郵王伯申曰。白虎通引書無有舉篇名者。不應於此忽亂其例。斯言足以破惑。

尙書大傳辨譌

尙書大傳南宋時已多佚脫今坊間盛行盧氏雅雨堂本譌漏不可勝舉如納之大麓之野烈風雷雨不迷致之以昭華之玉乃尙書逸篇文見水經濁漳水注而誤入唐傳厥兆天子爵乃尙書逸篇文見白虎通爵篇而誤入毋逸傳太平御覽兵部三十五引白虎通曰戰者何謂也尙書大傳曰戰者憚驚之也又曰諸侯之義非天子之命不得動衆起伐殺不義者所以強幹弱枝尊天子卑諸侯也

以上並見御覽

又曰以下仍是白虎通文見今

本誅伐篇而誤入鮮誓傳困學紀聞云費誓說文作柴

史記作盼。大傳作鮮。度作刑。以誥四方。周禮注云。度作
詳。刑案此大傳作鮮。四字斷句。度作刑。以下又一事。而
誤連鮮。度作刑。以誥四方爲句。入甫刑傳。學禮帝入東
學。至化輯於下矣。一段乃大戴禮保傳篇文。注亦盧辯
注。而誤連宣王問於春子條。入畧說。補遺所採亦多誤。
毛詩生民正義。傳上傳云。下傳云。皆謂毛傳。又引五帝
傳云。堯見天。因郃而生。后稷因之。案此乃卽有郃家室
句。毛傳文疏五帝二字有譌。而誤仍爲書大傳文。選應
休璉與從弟君苗君胄書注。引尙書大傳曰。扶寸而合
不崇朝而雨天下。鄭元曰。四指爲扶。下云。扶音膚。此三

字乃李善語而誤并爲鄭注毛詩文王正義書傳之美
太公言其翼佐文武身有殊勛世祚太公以表東海案
正義所傳書傳似泛舉傳記非謂伏生大傳盧學士文
昭續補遺載神農始治農功一條二十二字出楊泉物
理論容成作厯一條出世本並見藝文類聚卷五歲時
部下及御覽卷十六日者陽德之母一條十八字月羣
陰之宗一條十五字並出皇甫謐年厯見藝文類聚卷
一天部御覽天四湛濁爲地至故地者濁陰也一條三
句首句出神農書下二句出黃帝素問並見類聚卷六
地部分引河色黃赤一條二十五字出物理論見類聚

卷八水部上及御覽六十一往古之時至女媧殺黑龍以祭冀州一條二十一字出淮南子下引鄭注云冀州取地以爲名也云云三十一字乃釋名文並見類聚卷六州部堯南撫交阯一條見水經三十七淹水注惟首五字是大傳文其下於禹貢荊州之南云云十五字乃酈道元語洧盤之水出崦嵫山一條出禹大傳此別一古書見楚詞章句五年一朝一條見公羊傳桓元年注惟首四字疏云虞傳文其下王者亦貴得天下之歡心云云三十五字乃何休語文王受命四年伐昆夷一條見毛詩大雅譜正義惟首九字是大傳文下云采薇爲

伐昆夷而作乃孔穎達語成王之幼在襁褓一條見毛詩斯干正義下云襁褓縛兒被也五字亦穎達語綴之以食而弗殊有族食族燕之禮也一條見毛詩角弓正義上句引禮記大傳下句則穎達語武王伐紂都洛邑未成陰寒大雪一條九十八字出金匱見類聚卷二雪部凡羣妃御見之法一條自首至望後反之七十八字乃周禮九嬪注文自凡進御君所至旣御著于右手四十八字乃毛詩邶風靜女毛傳文自孔子曰日者天之明至使婦從夫放月紀二十九字亦周禮九嬪注文正義以爲出孝經援神契黃帝妃嫫母一條二十二字乃

列女傳文引見類聚十五后妃部夏刑大辟二百一條
十八字乃周禮司刑注文而盧學士一切羈入書大傳
孔廣林本據初學記帝王部增夢眉與髮等五字而初
學記無此文乃見北堂書鈔引帝王世紀又引周文王
至磻溪云云亦據初學記武部漁然此乃尙書中候文
初學記誤爲尙書大傳又如舜讓于德不怡惟刑之謚
哉予欲聞五聲六律八音采政忽禹鐵縈播旣都被明
都予辛壬娶塗山癸甲生啓有火自上復于下至于王
屋流爲烏其色赤其聲魄上刑挾輕下刑挾重天齊乎
人假我一日以上雖系今文尙書然不宜與傳相亂其

采女則有逸罰句本尔正注恐是引殷庚或癸誓之文而小有誤今竟依邢疏斷爲今文采梟誓曰虜乃獲斂乃阱引見周禮注下句亦引見說文支部真古文也今竟依賈疏斷爲今文皆不足據其篇次之亂者如古者處師一條雜記正義引作洛誥傳五嶽視三公一條王制正義引作夏傳此本並入咎繇謨天子三公一條據考工記序工正義引鄭夏傳注云云又古者天子三公一條儀禮經傳通解王制之戊引注云此夏時之官是兩文並在夏傳中而此本一入堯典傳一入太誓傳周以至動一條檀弓正義公羊傳隱元年疏並云畧說文

而此本入甘誓傳古之帝王必有大學小學一條王制正義引作周傳天子諸侯必有公桑蠶室一條毛詩瞻卽正義引作夏傳祭之爲寮也一條御覽五百二十四引作周傳此本皆誤入畧說又說命傳似當爲毋逸傳

毋佚共在高宗乃或諒陰三年不言

武成傳似當爲牧誓傳

今文牧誓傳載史記微

子之命似當爲微子

麥秀之歌當在行遷時作

歸禾似當爲嘉禾

大傳

之序有嘉禾

至所載鄭氏大傳注如下刑墨幪注幪音蒙三

字之文選求賢良詔注及七命注之文八伯注八伯者

據畿外八州畿內不置伯鄉遂之吏主之十九字乃鄭

志答張逸問之文舞雩離注詩云彼黍離離六字乃周

禮記釋氏正義文經魚魚刀注經字下夾注渠成切三字乃玉海王會解注後王伯厚語高宗梁開注閣讀如鵠鵠謂廬也八字乃禮記鄭注文決關梁踰城郭而畧盜者其刑贖一條注此二千五百罪之目畧也至閉于宮中三十九字乃周禮司刑註文師乃鼓篋譯注音符二字乃周禮大司馬釋文語廬學士考異在旋機玉衡條載別本有鄭注云轉運者爲機持正者爲衡案此乃鄭尙書注文見文選李蕭遠運命論注白魚入于舟中條載別本有鄭注云燔魚以祭變禮也亦鄭尙書注文見後漢書杜篤傳注四年營侯衛條載別本有鄭注云

建侯衛是封衛侯云云五十四字乃毛詩商風譜正義
文遂踐奄條載毛詩正義引此云多方傳鄭有注云奄
國在淮夷之旁云云三十字案毛詩破斧正義引書傳
遂踐奄云云不言是多方傳商風譜正義引書傳三年
伐奄下引多方云云乃孔穎達引尚書及鄭君尚書注
之文凡此皆舛繆之甚不可不亟正者也

八遷五遷辨

尙書序自契至於成湯八遷湯始居亳從先王居釋文云八遷之書史唯見四正義據國語史記云契至成湯十四世八遷者商頌帝立子生商是契居商世本云昭明居砥石左傳稱相土居商邱及今湯居亳事見經傳有此四遷其餘未聞僞孔傳言湯自商邱遷亳案自契至湯八遷若相土至湯竝不改都豈契至相土三世而有七遷耶必不然矣又盤庚云不常厥邑於今五邦書序云盤庚五遷將治亳殷又云仲丁遷于囂河亶甲居相祖乙圯于耿僞孔傳云自湯至盤庚五遷都盤庚治

亳殷孔疏云八遷五遷湯一人再數故班固云殷人屢遷前八後五其實止十二也馬融鄭康成王肅并數商邱亳囂相耿爲五僞孔傳則云湯遷亳仲丁遷囂河亶甲居相祖乙居耿我往居亳凡五徙國鄭注謂祖乙去相居耿國爲水所毀脩德以禦之不復徙僞孔傳云圯於相遷於耿史記殷本紀云祖乙遷於邢以上諸說八遷惟得其四五遷則傳疏與諸儒異路史亦止云八遷可見者六蕃砥石商商邱鄴亳也五遷馬鄭王上及商亳傳疏下逮亳殷皆爲疎漏案史記舜封契於商賜姓子氏中候握河紀云堯卽政七十二年封稷契皋陶

賜姓號鄭君書注云契本封商國在太華之陽皇甫謐云今上洛商是也括地志云商州東八十里商洛縣本商邑商所封也壽祺案卽今陝西商縣其地在華山南路史後紀十注契所封乃華陰鄭縣有櫟都城故蕃邑也水經注引世本謂契居蕃是矣

見水經卷十九注

水經注云

闕駟曰蕃在鄭西然則今櫟城是路史國名紀三曰地有高山魯連子云在太華之陽此一遷也世本又云昭明居砥石見書帝告釐沃疏昭明契子砥石地今無考此二遷也路史後紀十注又引世本昭明復居商此三遷也左氏傳相土居商邱世本同相土昭明子商邱今

縣屬河南歸德府杜預云今梁國睢陽宋都是竹書紀年亦云夏帝相十五年商侯相土遷于商邱此四遷也紀年又云帝芒三十三年商侯遷于殷徐文靖竹書統箋以此商侯爲子亥殷之號自此始世本亦云子亥遷殷可證史記冥生振卽子亥也何元子詩經世本古義以冥往河治水爲一遷非也盤庚疏云鄭以商自此號爲殷前未有殷名亦非此五遷也紀年孔甲九年殷侯復歸于商邱世本亦云孔甲復歸商邱統箋以爲此殷侯當是湯祖父主壬及主癸非也此六遷也紀年帝癸十五年商侯履復遷于亳此七遷也續漢志魏郡鄴劉

注引帝王世紀云縣西南有上司馬殷太甲常居焉路
史國名紀三云鄴上甲微居卽桐也今湯陰有司馬泊
司馬邨或云太甲蓋以鄴西桐有離宮商之墓地而繆
以上甲爲大甲爾此八遷之事也五遷囂相耿見書紀
年仲丁元年自亳遷于囂書疏引李氏云在陳留浚儀
縣皇甫謐云仲丁自亳徙囂在河北也或曰今河南敖
倉壽祺案或說亦見括地志史記作隄索隱曰隄亦作
囂左氏傳宣十二年杜注云敖山在滎陽縣西北括地
志云滎陽城殷之敖地也亦曰囂在敖山之陽山上有
城秦置倉其中曰敖倉山括地志又云敖倉在滎澤縣

西北十五里路史國名紀四云秦之敖倉今鄭之滎澤
穆天子傳囂氏之隧卽傳薄狩于敖者今滎澤縣治在
隋縣南五里則敖倉東南在今滎澤縣當二十里紀年
又云河亶甲元年自囂遷于相僞孔傳相在河北水經
廿三陰溝水注楚相縣虛荒今屬苦績漢志陳國苦春
秋詩曰相相有二左氏傳桓十五年注沛國相縣宋地
也其一則河亶甲所居尚書釋文今魏郡有相縣史記
正義曰括地志云故殷城在相州內黃縣東南十三里
河亶甲都郡國志寰宇記竝同路史國名紀四云亶甲
故城在安陽西北五里亶甲冢在城外西北隅洹水南

岸魏書道武幸鄴訪立州名崔光取亶甲居名之今爲河南彰德府地紀年又云祖乙元年自相遷于耿史記殷本紀耿作邢括地志絳州龍門縣東南十二里耿城故耿國也索隱曰邢音耿近代本亦作耿今河東皮氏縣有耿鄉路史國名紀四云卽晉滅耿賜趙夙者左氏傳閔元年杜注平陽皮氏縣東南有耿鄉開皇之耿州卽爲邢故通典亦云祖乙遷邢是邢卽耿也開皇十六年改定陽爲耿州今屬絳州河津縣皇極經世云祖乙圮于耿徙居邢非也紀年又云祖乙二年圮于耿自耿遷于庇八年城庇其後祖辛開甲

史記作沃甲

祖丁皆居之

又南庚三年遷于奄郡國志魯國卽奄國左氏昭四年傳因商奄之民命以伯禽曰商奄者或以商嘗遷此乎後陽甲居之又盤庚十四年自奄遷于北蒙曰殷殷本紀曰盤庚之時殷已都河北盤庚渡河南復居成湯之故居書疏云亳殷卽是一都汲冢古文云盤庚自奄遷于殷殷在鄴南三十里束皙云尚書序盤庚五遷將治亳殷舊說以爲居亳亳殷在河南孔子壁中書云將始宅殷與古文不同漢書項羽傳云洹水南殷墟上今安陽西有殷墟殷在河北與亳異也孔氏尚書正義駁之云洹水南有殷墟或當餘王居之非盤庚也

案河亶甲居相相在

今安陽洹水南有殷墟是直甲所居也

盤庚治於亳殷紂滅在於朝歌則

盤庚以後遷於河北蓋盤庚後王有從河南亳地遷於

洹水之南後又遷於朝歌史記曰盤庚涉河南治亳後

漢書文苑傳杜篤論都賦注引帝王世紀曰盤庚以耿

在河北迫近山水自祖辛以來奢淫不絕盤庚乃南渡

河徙都於亳

鄭君書注云徙居湯舊都又云治於亳之殷地

然則考之紀年自

湯至盤庚十九世凡七遷亳舊相耿庇奄殷也湯自商

邱遷亳在夏帝癸十五年為成湯元年及即位因居之

厯太戊凡八世百七十五年開國定都久厯年所不宜

以受命興王之地

毛詩元鳥箋云湯始居亳之殷地為受命

并入五遷之數

書所謂五邦蓋斷自湯有天下後言之囂也相也耿也
庇也奄也是爲五遷路史云庇奄書所不載而世儒輒
以湯與盤庚之兩都足之誤矣或更以五遷皆出盤庚
尤妄至書傳疏并數盤庚居亳時盤庚居奄方與臣民
謀徙且經文上言先王下言今不承於古安得以已之
欲遷充其數乎

三毫辨

路史云湯都南毫今南京穀熟高辛之都與葛鄰案高辛與

湯之都並杜偃師非穀熟也路史誤毫有五一在杜南先世之居路史注長安杜

南有毫亭有潏水○案說文毫為京兆杜一偃師西毫陵亭史記集解徐廣曰京兆杜縣有毫亭

路史注屬西京或以此為湯都誤水經注梁國二毫是

矣案梁國二毫當指穀熟與蒙路史注非偃師屬河內不屬梁而考城為北毫封後隸拱州景毫薄是路史注漢薄縣

屬山有景山毫城湯亭九域志景湯受命都之路史注古毫城

在亳城東北五十三里有一鄭地路史注左氏傳而譙湯葬亦有潏水盤庚徙治

弗預路史注今亳州譙郡近南毫○案漢沛郡譙縣後縣地亦屬沛郡唐天寶二年始置蒙城縣今亦屬潁州

此與皇甫謐所言無涉水經注又引皇覽曰薄城北郭

東一二里平地有湯冢在漢屬扶風今徵之邈渠有湯池徵陌是也。案史記秦宣公本紀云二年伐湯三年與亳戰亳王奔戎遂滅湯然則周桓王時自有亳王南號湯爲秦所滅乃西戎之國葬於徵者非殷湯矣

北亳亦皆曰商陽路史注或以考城爲南亳安或以實三

亳阪尹者妄壽祺按漢書地理志河南郡偃師縣有尸

鄉殷湯所都而於梁沛陰山陽諸郡國皆不言湯都續

漢志屬河南尹劉昭注引皇覽曰有湯亭有湯祠鄭君

書注曰河南偃師縣有湯亭主班志說孔疏引尚書中

候格予命云天乙在亳東觀在洛是指偃師在洛西也

續漢志河南尹鞏縣劉注又引左氏傳商湯有景亳之

命杜預曰鞏縣西南有湯亭按今河南府偃師鞏二縣

鄰接鞏縣之湯都卽偃師之亳也湯之創業始於景亳
故曰朕哉自亳後遷居囂墟亦名爲亳亳本帝囂之墟
在禹貢豫州河洛之間卽偃師戶鄉也書有帝告釐沃
告卽囂省文書序言從先王居是湯有天下實遷居偃
師而皇甫謐則云孟子稱湯居亳與葛爲鄰按地理志
葛今梁國宣陵之葛鄉是也宣陵去偃師八百里而使
亳眾爲耕童子餉食非其理也皇甫謐說見水經二十
三汲水注又見尚書疏
今梁國有二亳南亳在穀熟北亳在蒙非偃師也盤庚
治亳殷偃師是也然則殷有三亳二在梁國一在河洛
之間穀熟爲南亳卽湯都也蒙爲北亳卽景亳是湯所

受命也偃師為西亳卽盤庚所徙也立政曰三亳阪尹

是也

以上見續漢郡國志注

案謚言三亳小顏漢書注羅莘路史

注已糾之考湯及盤庚所都唯有偃師與蒙若穀熟獨

自謚言之不足信也據紀年盤庚遷於北蒙曰殷則明

在北亳而非西亳謚言誤矣又續漢志云梁國薄縣湯

所都劉注引杜預曰梁國蒙縣西北有薄城城中有湯

冢其西又有微子冢

左氏傳莊十二年蒙澤注作亳城續志注引杜語作薄亳薄二字通

微子杜注作箕子

臣瓚於前漢志山陽薄縣下云湯所都又曰

湯居亳今沛陰亳縣是也

水經汲水注引闕駟語以為湯都

今薄有湯

冢已氏有伊尹冢皆相近孔冲遠厯引諸說疑未能辨

今按蒙穀熟古但名高邱不名亳薄縣者漢本屬山陽

郡後漢又分其地置蒙穀熟與薄並改屬梁國

漢薄蒙穀熟故

城在今夏邑永城二縣晉又改薄爲亳且改屬沛陰皇甫謐杜預

臣瓚司馬彪皆晉人諸家所云本一說也但謐言穀熟

爲南亳失之不經言湯與盤庚所都又失其實水經注

汧水雖水二篇言北亳南亳亦沿謐說班志云宋地今

之沛梁楚山陽沛陰東平及東郡之須昌壽張皆宋分

也又云昔堯作游成陽舜漁雷澤湯止於亳是以此爲

湯游息之處也然則湯實都偃師其蒙縣劉昭云湯所

盟處蓋湯爲諸侯時居之盤庚亦徙居之謐以湯都南

亳不都西亳又謬矣師古於偃師下注引劉向云殷湯無葬處以折臣瓚湯冢之說而於山陽薄縣下復采瓚

注按元和志云亳薄字異義同

案管子輕重篇湯以七十里之薄兼桀之天下

墨子非攻下湯奉桀眾以克有屬諸侯於薄周書殷祝解湯放桀而復薄荀子議兵篇古者湯以薄武王以瀋

尚書大傳呂氏春秋卷十八慎大篇曰湯嘗約於鄆薄亳皆為薄

案廣韻鄆殷國名呂覽高誘注讀如衣今兗州人謂殷氏皆曰衣憤勢篇同又禮記中庸鄭注殷讀如衣今姓有衣者殷之胃與路史謂鄆即殷非也水經注二十三汧水引皇覽曰湯

冢在濟陰亳縣北東郭去縣三里冢四方各十步高七尺上平也漢哀帝建平元年大司空史卻長卿按行水災因行湯冢然則諸冢之言以湯嘗止於亳指實其

處而穀熟與蒙不得分爲二毫也杜預亦兼存偃師其
意止有東西二毫故以商頌景毫爲周地也三毫當如
鄭君書注謂遷毫之民而分爲二東成皋南轅轅西降
谷是酈道元水經汧水注張守節史記正義嚴粲詩緝
並謂湯自南毫遷西毫李吉甫元和郡縣志樂史太平
寰宇記歐陽忞輿地廣記並謂穀熟爲湯都皆本之皇
甫謚謚之前無爲是言者路史雖糾謚妄猶不免爲謚
所欺也按隋唐之宋州宋之應天府卽今河南歸德府
水經注大蒙城水經汧水注汧水又東逕蒙縣故城北
俗謂之小蒙城汧水又東逕大蒙城北
自古不聞有二蒙疑卽蒙
毫也所謂景毫爲杜毫矣
在今歸德府高邱縣北四十

里穀熟故城在今高邱縣東南四十里若如謚言商亡
偃師相去七八百里蒙穀熟相去止數十里奈何強充
分以充二毫之數乎

史記高祖本紀正義曰盤庚國殷中之地改商爲殷在
商州安陽縣卽北蒙殷虛王伯厚地理通釋據之非也
河亶甲始居相祖乙始自相遷耿故世以朝歌北爲殷
墟盤庚所徙北蒙在蒙縣也紀年云武乙三年自殷遷
於河北案此與史記
殷本紀合十五年自河北遷於沫案此路史
系之武丁

從水經卷九淇
水注酈道元說路史國名紀云在朝歌故城南詩沫之

鄉者近紂都水經注紂都在冀
州大陸之野卽此紀年又云文丁元年王

卽位居殷附注自洙歸殷邑紀年又於帝辛帝乙皆云

居殷路史引帝王世紀曰帝乙復濟河北徙朝歌引路史

爲武則自帝乙而後遂名朝歌爲殷矣帝王世紀曰紂

自朝歌北築沙邱臺史記正義曰紀年自盤庚徙殷二

百五十二年更不徙都紂時稍大其邑南距朝歌北據

邯鄲及沙邱皆爲離宮別館然紂所居殷乃帝乙徙朝

歌地也以爲盤庚之殷殊誤朝歌兩漢志並屬河內郡

云紂所都按今衛輝府淇縣是漢志云南有牧野水經

注引應氏地理風俗記曰河內殷國也周名曰南陽路

史注引相州圖經云安陽紂都也在淇洹之間所謂北

蒙戰國策所謂紂兵左飲淇右飲洹者又云庚丁徙河

北號北殷地卽殷墟在相之安陽西有澱水北去朝歌

百三十里

路史注南去鄴三十里史記項羽傳洹水南殷墟是河北也

有殷城

案水經卷

九沁水注引述征記河內懷有殷城元和志在武陟東南十里殷王卬治之考紀年秦伐鄭次於懷城殷殷之路

爲名晉之殷州以水經九沁水注劉聰建中復爲澱州史久矣

注建中二年以陳之澱水置貞元二年廢元和十二年復立○案此陳州商水縣秦置澱強縣漢改曰潁彊隋

改爲澱水唐名澱州宋改商水唐又置殷州今衛輝府獲嘉縣地路史云自盤庚至紂

復五遷

盤庚蒙武丁徙河北武丁徙朝歌

世不知矣然所數

庚丁一徙與史記紀年皆不合未詳何據韋昭楚語注

又謂武丁遷於河內從河內往亳都此盤庚以後遷都

之事也

左海經辨

卷上

五

辨儀禮喪服經傳鄭注二事

歟孝廉方正程瑤田撰喪服文足徵記疏通經傳多窮極精微之指惟大功章二事意所未安謹辨明之亦程氏不阿好鄭君之義也

一事大夫之妾所爲服

舊本喪服大功章經傳

經大夫之妾爲君之庶子女子子嫁者未嫁者爲世父母叔父母姑姊妹傳曰嫁者其嫁於大夫者也未嫁者成人而未嫁者也何以大功也妾爲君之黨服得與女

君同

舊本無下言以下二字據鄭注知之

鄭康成考定經傳

經大夫之妾爲君之庶子。傳曰何以大功也。妾爲君之黨服得與女君同。

經女子子嫁者未嫁者爲世父母叔父母姑姊妹。傳曰嫁者其嫁於大夫者也。未嫁者成人而未嫁者也。鄭本以下二十一守在註中。

今本經傳鄭注

經大夫之妾爲君之庶子。注下傳曰何以大功也。妾爲君之黨服得與女君同。指謂此也。妾爲君之長子亦三年。自爲其子期異於女君也。士之妾爲君之衆子亦期。

經女子子嫁者未嫁者爲世父母叔父母姑姊妹注舊
讀合大夫之妾爲君之庶子女子子嫁者未嫁者言大
夫之妾爲此三人之服也傳曰嫁者其嫁於大夫者也
未嫁者成人而未嫁者也何以大功也妾爲君之黨服
得與女君同下言世父母叔父母姑姊妹者謂妾自服
其私親也注此不辭卽實爲妾遂自服其私親當言其
以見之齊衰三月章曰女子子嫁者未嫁者爲曾祖父
母經與此同足以見之矣傳所云何以大功也妾爲君
之黨服得與女君同文爛在下爾女子子成人者有出
道降旁親及將出者明當及時也

今考定經傳鄭注

經大夫之妾爲君之庶子鄭注下傳曰何以大功也妾爲君之黨服得與女君同指謂此也妾爲君之長子亦三年自爲其子期異於女君也士之妾爲君之衆子亦期

經女子子嫁者未嫁者爲世父母叔父母姑姊妹傳曰嫁者其嫁於大夫者也未嫁者成人而未嫁者也何以大功也妾爲君之黨服得與女君同鄭注舊讀合大夫之妾爲君之庶子女子子嫁者未嫁者言大夫之妾爲此三人之服也下言爲世父母叔父母姑姊妹者謂妾

自服其私親也此不辭卽實爲妾遂自服其私親當言其以見之齊衰三月章曰女子子嫁者未嫁者爲曾祖父母經與此同足以見之矣傳所云何以大功也妾爲君之黨服得與女君同文爛在下爾女子子成人者有出道降旁親及將出者明將及時也

壽祺謹案鄭君於喪服大功分此章爲二以大夫之妾所爲服爲一等女子子嫁者未嫁者所爲服爲一等注中兩引傳文皆止於得與女君同其下言以下二十一字非傳乃鄭注述舊讀之詞傳寫誤與傳亂耳鄭下經注云舊讀合大夫之妾爲君之庶子女子子嫁者未嫁

者言大夫之妾爲此三人之服也此注三十二字當退在傳下卽繼以下言二十一字並屬舊讀蓋上言爲君黨下言爲私親黨文義相承不可割截下又繼之曰此不辭卽實爲妾遂自服其私親當言其以見之此鄭破舊讀之意謂誤在舊讀不在傳也假令下言二十一字是傳文則傳故以妾貫三等之服所云爲君之黨實兼二等不得專屬上經君之庶子鄭何以不斥傳誤轉指爲文爛在下乎賈公彥疏云下言二字謂妾遂自服其私親也九字旣非子夏自著又非舊讀者自安必是鄭君置之賈氏所見鄭本已譌故說亦不了程氏喪服文

足徵記乃謂傳實有此二十一字而鄭意以爲衍文傳果有此文安得爲衍且與文爛之語何自相戾也鄭注本無一字斥傳橫加此言得無誣乎又注云此不辭者鄭以私親不言其爲不辭故下引齊衰三月章曰女子嫁者未嫁者爲曾祖父母經與此同足以明之此鄭舉經非私親不言其之例程氏乃謂鄭斥傳下言二字爲不辭亦非鄭意也雖然經例固有正親而言其者大夫公之昆弟大夫之庶子爲其昆弟之長殤是也亦有私親而不言其者公之庶昆弟大夫之庶子爲母妻是也此經以大夫之妾建首其下一爲君黨一爲私親黨

分別截然鄭君必以不言其為不辭亦固矣程氏女子決無逆降之辨吾蓋有取焉

二事公之庶昆弟大夫之庶子所為服

舊本喪服大功章經傳

經公之庶昆弟大夫之庶子為母妻傳曰何以大功也先君餘尊之所厭不得過大功也大夫之庶子則從乎大夫而降也父之所不降子亦不敢降也

經昆弟

經皆為其從父昆弟之為大夫者

鄭注考定經傳

經公之庶昆弟大夫之庶子爲母妻昆弟傳曰何以大功也先君餘尊之所厭不得過大功也大夫之庶子則從乎大夫而降也父之所不降子亦不敢降也注言從乎大夫而降則於父卒如國人也昆弟庶昆弟也舊讀昆弟在下其於厭降之義宜蒙此傳也是以上而同之父所不降謂適也

經皆爲其從父昆弟之爲大夫者注皆者言其互相爲服尊同則不相降其爲士者降在小功適子爲之亦如之

徐氏讀禮通考程氏喪服文足徵記皆以昆弟宜

依舊讀在下。謂大夫爲子爲士者大功大夫之子爲昆弟爲大夫者期。兩相互見不必重出。而程氏之辨尤長。今先考喪服經大夫公之昆弟大夫之庶子所爲服。次考昆弟之服。具錄如左。而後正之。

大夫公之昆弟大夫之庶子所爲服之等差。喪服經不杖期章。大夫之子爲世父母。叔父母。子昆弟。姑姊妹。女子子無主者。爲大夫命婦者。

大夫之庶子爲適昆弟。

殤大功章。大夫爲適子之長殤中殤。

大夫之庶子爲適昆弟之長殤中殤。

成人大功章大夫爲世父母叔父母子昆弟昆弟之子

爲士者

注子謂庶子

公之庶昆弟大夫之庶子爲母妻昆弟

皆爲其從父昆弟之爲大夫者

大夫大夫之妻大夫之子公之昆弟爲姑姊妹女子子嫁於大夫者

殤小功章大夫庶子爲適昆弟之下殤

大夫公之昆弟大夫之子爲其昆弟庶子姑姊妹女子子之長殤

成人小功章大夫大夫之子公之昆弟爲從父昆弟庶

孫姑姊妹女子子適士者

注從父昆弟及庶孫亦謂爲士者

昆弟之服之等差

喪服經不杖期章昆弟 大夫之子爲昆弟爲大夫者

大夫之庶子爲適昆弟

殤大功章昆弟之長殤中殤 大夫之庶子爲適昆弟

之長殤中殤

成人大功章大夫爲子昆弟爲士者 公之庶昆弟大

夫之庶子爲昆弟皆爲其從父昆弟之爲大夫者注其爲士

者降在大功適子爲之亦如之 從父昆弟 爲人後者爲其昆弟

殤小功章昆弟之下殤 大夫之庶子爲適昆弟之下

殤 大夫公之昆弟大夫之子爲其昆弟之長殤注謂爲士

者若不仕者也云公之昆弟為庶
子之長殤則知公之昆弟猶大夫
為人後者為其昆

弟從父昆弟之長殤

成人小功章從祖昆弟大夫大夫之子公之昆弟為從

父昆弟注從父昆弟亦謂為士者

總麻章族昆弟從祖昆弟之長殤從父昆弟之下

殤

壽祺謹案喪服大功章公之庶昆弟大夫之庶子為母
妻昆弟昆弟二字由鄭君始移傳上與母妻相屬程氏
以為宜依舊讀在下然下經即云皆為其從父昆弟之
為大夫者文義明承二庶言之若加昆弟二字於其上

則贅甚而於皆爲之文轉相隔闕且所服者從父昆弟其爲之服者自視亦從父昆弟也惡得復冠以昆弟之文此誠不辭矣昆弟相爲辭一而已經有大夫之庶子爲適昆弟此繫大夫言之不曰庶昆弟爲適昆弟也有公之昆弟爲其昆弟之長殤此別於父在之稱繫公言之不曰昆弟爲其昆弟也今爲從父昆弟之爲大夫者而復冠以昆弟然則不杖期章之昆弟可曰昆弟爲昆弟乎大功章之從父昆弟可曰昆弟爲從父昆弟乎小功章之從祖昆弟可曰昆弟爲從祖昆弟乎總麻章之族昆弟可曰昆弟爲族昆弟乎吾有以知其必不通矣

夫互見互省之例經多有之然審數終篇又不可盡拘
經著大夫大夫之子公之昆弟三者之爲服最備請比
而觀之不杖期章曰大夫之庶子爲適昆弟殤大功章
曰大夫爲適子之長殤中殤大夫之庶子爲適昆弟之
長殤中殤殤小功章曰大夫庶子爲適昆弟之下殤此
庶子爲適昆弟之服之從乎大夫者經具詳之未嘗互
省也不杖期章不特言大夫爲適子者適子之服上下
同之也成人大功章有大夫爲子昆弟爲士者之服不
杖期章有大夫之子爲昆弟爲大夫者之服殤小功章
有大夫公之昆弟大夫之子爲其昆弟庶子之長殤之

服此三章程氏所謂互見者也今攷大夫爲庶子爲士者大功爲庶子之長殤小功其爲庶子爲大夫者之服不見傳曰尊同則得服其親服已明之矣而大夫之子爲昆弟爲大夫者不杖期公之庶昆弟大夫之庶子爲昆弟大功公之昆弟大夫之子爲昆弟之長殤小功則是庶昆弟之服成人及殤等差悉具其從乎大夫而降者亦益明此與庶子爲適昆弟之服諸條其例正同胡爲必以互省爲是而以各見爲非也且大功章大夫條不杖期章大夫之子條此兩章所互見唯大夫爲昆弟爲士者與大夫之子爲世父母叔父母爲大夫者一等

耳若大夫之世父母叔父母於其子爲從祖父母其通服在小功章大夫之子其子與昆弟之子於大夫皆爲庶孫其服亦在小功章前兩章中不能互見也至於大功章著大夫爲昆弟之子爲士者又著二庶爲從父昆弟之爲大夫者小功章又著大夫之子公之昆弟爲從父昆弟爲士者是從父昆弟之服之從乎大夫者經未嘗互省也不杖期章著大夫之子爲姑姊妹女子子無主者爲命婦者大功章又著大夫大夫之子公之昆弟爲姑姊妹女子子嫁于大夫者小功章又著大夫大夫之子公之昆弟爲姑姊妹女子子適士者殤小功章又

著大夫公之昆弟大夫之子爲其姑姊妹女子子之長
殤是姑姊妹女子子之服之從乎大夫者經未嘗互省
也然則獨庶昆弟之服之從乎大夫者胡爲必以互省
爲是而以各見爲非乎故蒙謂經之昆弟二字宜上同
而不可下同程氏之言失之矣問者曰如是則舊讀誤
與答曰鄭注但云昆弟舊讀在下賈疏亦但云馬融等
抽之在傳下而不言舊屬皆爲其從父昆弟之上是舊
讀昆弟在下亦必係專條立文決非連綴皆爲二字之
上合而爲一也自宋以來馬融等舊本禮經已亡學者
惟見鄭君更易之本遂不察而以俗讀之誤合者爲舊

讀矣。昆弟已見不杖期章。此繫二庶。文重出而義各殊。如齊衰三月章。大夫爲宗子舊君兩條。舊君亦見上經。文重而義異。與此二庶之爲昆弟一例也。二庶之母妻。爲私親。而昆弟非私親。故厭降之義。傳於母妻發之。不於昆弟發之。諸侯大夫之厭降。其妾與庶婦。不見於經。而大夫降其庶子。已見大功章。故傳於二庶之母妻。詳之於昆弟。則畧而不言也。明乎此。則昆弟二字。從舊讀。可從鄭讀。亦可。而如俗讀連綴下條。則詞義違戾。九經所必無之文法。不可以厚誣古人審矣。

庶子爲父後其妻爲本舅姑服說

通典庶子爲父後其妻爲本舅姑服議晉賀循云庶子爲父後爲其母總麻三月庶子之妻自如常服尊所不降也孔瑚問虞喜曰愚謂庶子之妻不得如禮服其私親者以爲身爲宗主奉修祭祀以別尊卑故也凡婦服夫黨皆降一等唯公子厭至尊故其妻從輕而服重盡禮於皇姑不得以公子爲例喜答曰庶子爲父後厭於承重不得申其私情故爲所生服總麻其婦當依公子之妻盡禮皇姑從輕服重不繫於夫哀帝興宣中哀靖皇后有章太妃之喪尙書奏至尊總麻皇后齊衰案周

禮舅不厭婦故得以本服綦母遂駁公子不繼祖禰故
妻得申皇姑夫人致齋而會於太廟后服不宜踰至尊
亦當總麻也壽祺謹案庶子承重故降其母總妻雖有
共祭之文而無承重之義則爲皇姑何不得伸之有如
妻有私親服亦不當共祭爲皇姑可知也凡婦服夫黨
降一等不聞於已降者而再降之也夫雖降服臨之以
姑則婦不得以從降爲義從輕服重本不繫夫以卑承
尊豈宜隆婦不厭於舅卽不厭於祖禰存且得伸死又
何厭爲公子之妻尙得盡禮皇姑爲繼祖禰者之妻轉
令降其本服是母之所伸於子者少而所詘於婦者多

豈聖人所以因名制禮之意乎賀循虞喜之說得之惜其引例猶未能盡也然而賢於孔瑚綦母邃遠矣

始禘終禘辨

禮記王制正義云注云三年喪畢祫於太祖廟明年春禘於羣廟元鳥三更有禘於其廟之文者謂練時遷主遞廟新死者當禘祭於其廟以安之故鬯人云廟用脩注云謂始禘時左氏說禘在既期之後然則禘於其廟在於練時而元鳥箋云喪三年既畢禘於其廟者鄭將練禘總就喪畢祫於太祖而言之其實禘廟在練時也熊氏一說謂三年除喪特禘新死者於廟未知然否周禮鬯人賈疏云始禘者謂練祭後遷廟時以其宗廟之祭從自始死以來無祭今爲遷廟以新死者木主入

廟特爲此祭故云始禘時以三年喪畢明年春禘爲終
故云始也鄭知禘遷廟在練時者案文二年穀梁傳云
作主壞廟有時日於練焉壞廟壞廟之道易檐可也改
塗可也是時木主新入廟禘祭之是以左氏說凡君薨
祔而作主特祀主於寢畢三時之祭基年然後烝嘗禘
於廟許慎云左氏說與禮同鄭無駁明用此禮鄭義與
穀梁傳合賈服以爲三年終禘遭烝嘗則行祭禮與前
所違非鄭義也壽祺案疏家謂禮有始禘有終禘旣基
練後之始禘義見周禮邕人穀梁傳三年喪畢之終禘
義見左氏說二者各不相蒙然攷通典古禘祫晉博士

徐禪議引春秋左氏傳曰歲祫及壇墠終禘及郊宗石室許慎舊說曰終者謂孝子三年喪終則禘於大廟以致新死者也王制正義載熊氏一說卽賈服許之說無所謂莽年禘祭也周禮鬯人亦無禘祭明文鄭君注周禮大宗伯禮記王制皆以三年終禘爲魯禮毛詩商頌正義以爲鄭箋言君喪以下亦謂魯禮也周禮疏禮記正義兩引元鳥箋喪三年旣畢之下皆誤多禘於其廟四字是以孔疏緣此謂鄭將練禘總就喪畢祫於太祖而言之賈疏緣此引左氏說烝嘗禘於廟之上廡入期年二字皆傳會曲說也陸德明毛詩音義於元鳥箋

附載一本裕於太祖之上更有禘於其廟四字云前裕
後禘是前本兩禘夾一裕是後本毛詩元鳥正義云此
箋或云古者君喪三年喪畢禘於其廟而後裕於太祖
自此之後五年而再殷祭其文誤也禮注及志皆無此
言案禮注謂禮記王制注志謂鄭君禘裕志則此不當獨有也定本亦無此
文詩疏駁正最明今俗本毛詩箋仍有禘於其廟四字
當刪

祭感生帝解

或問鄭康成注禮感生帝之說信乎答曰禮記喪服小記大傳並曰王者禘其祖之所自出以其祖配之鄭注喪服小記曰禘大祭也始祖感天而生祭天則以祖配之注大傳曰大祭曰禘大祭其先祖所由生謂郊祀天也王者之先祖皆感太微五帝之精以生倉則靈威仰赤則赤熛怒黃則含樞紐白則白招矩黑則汁光紀皆用正歲之正月郊祭之蓋特尊焉孝經曰郊祀后稷以配天配靈威仰也謹案鄭君之義禘郊異祭禘以嚳配郊以后稷配禮記注以禘爲郊緣二者天祭故正月祈


穀之郊祭感生帝者亦得名禘也而周官大司樂注又引大傳曰王者必禘其祖之所自出祭法曰周人禘饗而郊稷謂此祭天圜丘以饗配之其言與禮記注違異疑有脫誤郊特牲正義述王肅難鄭數事但舉以大傳之禘施之於郊而不舉以禘所自出施之於圜丘則周官注殆失其舊與漢書韋平成傳平成等四十四人奏議稱祭義曰王者禘其祖自出以其祖配之而立四廟言始受命而王祭天以其祖配所謂祭義之文謂禘爲與喪服小記同祭天鄭說實出於此荀子禮論大戴記禮三本皆曰王者天太祖蓋周秦先師相傳古義不可廢也五經異義


曰詩齊魯韓春秋公羊說聖人皆無父感天而生左氏
說聖人皆有父鄭駁曰諸言感生得無父有父則不感
生此皆偏見之說也商頌曰天命予鳥降而生商謂娥
簡吞齔子生契是聖人感生見於經之明文劉媪是漢
太上皇之妻感赤龍而生高祖是非有父感神而生者
耶且夫蒲盧之氣嫗煦桑蟲成爲已子況乎天氣因人
之精就而神之反不使子賢聖乎此鄭發明感生之義
也案毛詩生民曰履帝武敏歆箋曰帝上帝也是與上
帝不宣上帝居歆傳名無二同謂天帝魯頌閟宮曰上
帝是依箋曰依依其身也經言后稷感生之事昭昭矣

自河圖尙書中候稷起苗興及詩齊魯韓春秋公羊說
史記周本紀司馬遷說三代世表褚先生說皆本之經
非有誣妄鄭學之徒王基馬昭孫毓張融等反覆推明
咸得厥指且周人立闕宮以祀姜嫄大司樂舞大濩以
享先妣舊典無文猶朔舉之而不爲異南郊之祀感生
帝又何多惟或曰前乎周人有諸乎曰禮記月令注以
伏羲爲著精之君正義曰傳言母華胥履大人之跡生
伏羲於成紀則其感生之帝亦靈威仰也易曰帝出乎
震此之謂也禮記大傳正義曰師說引河圖云堯赤精
舜黃禹白湯黑文王蒼元命包云夏白帝之子殷黑帝

之子周蒼帝之子毛詩商頌序長發大禘也箋曰大禘
郊祭天也引禮記王者禘其祖之所自出證之其詩曰
有娥方將帝立子生商箋曰帝黑帝也正義曰商是水
德黑帝之精故云黑帝謂汁光紀也此商祭感生帝之
驗也


古銅柶圖裏






究

古銅枳圖表





車

古銅柶圖說

右銅器以建初慮僦尺校之長尺有一寸五分攬長五寸一分強博二寸五分深八分柄長四寸五分厚一分強銳其端柄之兩旁爲雷回紋中央立羊一立豕一皆向攬其端之外爲牛首仰而迤高二寸豕大於羊牛首又倍之牛領下有梁繫小鈴圍二寸一分并紐徑一寸四分金石書皆不載是物攷之禮經所謂柶是也鄭君儀禮士冠禮注云柶狀如匕是柶與匕二物說文解字云柶匕也周官玉府鄭注云角柶角匕也蓋二物亦通名聶司業三禮圖引舊圖云疏匕長二尺四寸葉長八

寸博三寸。枲長尺。攔博三寸。曲柄長六寸。漆赤中及柄端。二器長短異矣。禮記喪大記孔氏正義云。枲長六寸。兩頭屈曲。此用以楔齒。故短。梁阮二氏舊圖。枲爲勺形。聶氏因之。案有司徹鄭注云。疏七挑七。狀如飯操。

操聶氏三

禮圖作
秉音鑿

枲旣如匕。何以匕直而枲曲。今此器體直而柄

端少曲。實與匕近。非勺形。孔氏兩頭屈曲之說。亦失之。枲施於醴。亦施於鉶。醴有糟。鉶有菜。故以枲扱之士冠士昏醴。枲皆用角。士喪醴。枲用木楔齒。用角枲。而公食大夫少牢饋食鉶。枲不言其材。陳博士禮書疑亦角爲之。案枲字从木。而禮有角枲。取其滑也。今此器乃銅蓋。

賓祭與冠昏喪異宜。且天子諸侯與大夫士異制。如鎡
从金卽金豆。而爾雅瓦豆謂之登。櫺本从木。而後世以
瓦故从缶作壘。簋簋本从竹。而所傳叔郭父簋伯考父
簋宋公寶簋皆以銅爲之。此其證也。禮器鬱勺爲龍頭
疏七柄刻畫雲氣。枳之條。天爵。古者鼎彝敦簋之屬多
以三物爲飾。少牢饋食禮鄭注云。周之禮飾器各以其
類。此器刻三牲。蓋公羊大夫之銅枳也。曷言之。士冠禮
賓醴冠者。士昏禮女父醴使者。舅姑醴婦。聘禮主君禮
賓授醴者皆加枳。受醴者皆以枳祭醴。三坐啐醴。建枳
興。建士冠禮作捷音義捷又作插又作扱士冠禮注醴
賓不用枳涉其醴案經無禮不用枳之文鄭依內則

言之似祭醴三者士昏記所謂始扱一祭又扱再祭也

聘禮記然醴亦云扱不必飾三牲則此器於祭醴無施也士

虞禮曰祭鉶嘗鉶士虞記曰鉶芼用苦若薇有滑夏用

葵冬用菹有柶少牢饋食禮曰上佐食羞兩鉶羊鉶皆

芼皆有柶尸扱以柶祭羊鉶遂以祭豕鉶嘗羊鉶有司

徹曰尸坐以羊鉶之柶祭羊鉶遂以挹豕鉶挹石經祭

于豆祭案祭鉶在饋孰時尸隨祭而未飯主人羞所俎

之後然宗廟之事鉶各有柶不宜一器而飾三牲則此

器於饋食之祭亦無施也惟公食大夫禮宰夫設鉶四

于豆西東上牛以西羊羊南豕豕以東牛賓挹手扱上

鉶以柶辯擣之止鉶之間祭案凡祭皆於邊豆之間或上豆之間此獨言上鉶之間賈氏疏謂著其異於餘者是也公食大夫記曰鉶芼牛藿羊苦豕薇皆有滑公食大夫有四鉶牛二羊一豕一上鉶者牛鉶也辯擣則及羊鉶豕鉶鉶有四而扱上鉶辯擣惟有一柶賈氏疏謂優賓故用一柶而已少牢二鉶祭神故宜各有柶是也一柶而施於四鉶故此器柄端三牲之飾所以尚象則宜斷爲公食大夫祭鉶之器柄端牛領有鈴猶刀之有鸞義貴聲和鉶羹以和五味爲美故扱鉶之器取焉聶氏云鉶柶亦宜如疏匕淺升爲之方得扱鉶芼之滑以

祭醴枬葉又淺於銅枬今此器柄葉長短與聶圖相近而深不及寸則銅枬亦淺矣授枬之法有面葉有面枋

儀禮古文葉為揭今文枋為柄揭即搯字士冠士昏贊者酌醴皆面葉賓與

主人受醴皆面枋聘禮宰夫與公授醴皆面枋賓啐醴

則尚搯祭銅則少牢饋食之尸公食大夫之賓皆自取

枬蓋禮遠者授近者不授也公食大夫禮賓祭黍稷祭肺祭庶羞之大皆贊者授

之祭豆以枬祭銅祭飲酒祭梁稻皆自取之少牢饋食禮尸祭黍稷祭牢肺祭牢幹祭魚祭腊肩祭牢骼祭牢

肩皆上佐食授之舉之祭豆以枬祭銅皆自取之禮家不得古人之象名存而

實亡董彥遠謂漢世古器未出宜不得考其制自韋昭

之解方鼎劉杳之釋犧尊尙未能盡合於古況他人乎

得此乃見三代法物之遺可補禮注之闕而訂舊圖之誤巡撫蕭山王公出以示壽祺命攷之謹據禮經爲圖說以復如此

饗禮攷

周禮掌客掌四方賓客之牢禮餼獻飲食之等數又曰凡諸侯之卿大夫士爲國客則如其介之禮以待之鄭康成注曰言其特來聘問待之禮如其爲介時也

春秋左氏傳宣公十六年曰晉侯使士會平王室定王享之原襄公相禮殺烝武子私問其故王聞之召武子曰季氏而弗聞乎王享有體薦宴有折俎公當享卿當宴王室之禮也杜預注曰烝升也升殺於俎享則牛解其體而薦之所以示恭儉體解節折升之於俎物皆可食所以示慈惠也孔穎達正義曰折俎卽殺烝是也言

諸侯親來則爲之設享又設宴享用體薦宴有折俎若使卿來雖爲設享仍用今之燕法亦用折俎是王室待賓之禮也周語王召士季曰禘郊之事則有全烝王公立飫則有房烝親戚宴饗則有殺烝今女非它也而叔父使士季實來修舊德以獎王室唯是先王之宴禮欲以貽女余一人敢設飫禘焉忠非親禮而干舊職以亂前好又曰女今我王室之二兄弟以時相見將齎協典禮以示民訓則無亦擇其柔嘉選其馨香潔其酒醴品其百邊脩其簠簋奉其犧象出其尊彝陳其鼎俎靜其巾幕敬其祓除體解節折而共飲食之於是乎有

折俎加豆酬幣宴貨以示容合好韋昭注曰全烝全升
牲體而升之也凡郊禘皆血腥也王天子公諸侯也禮
之立成者爲飫房大俎也詩云邊豆大房謂牛解其體
升之房也穀烝升體解節折之俎謂之折俎也又曰邊
竹器容四升其實棗栗糗餌之屬簠簋黍稷之器犧犧
尊飾以犧象象尊以象骨爲之飾尊彝皆受酒之器俎
設於左牛豕爲一列魚腊腸胃爲二列膚特於東巾幘
所以覆尊彝袞袞除猶掃除也加豆謂旣食之後所加之
豆也其實芹菹菹醢之屬酬報也聘有酬賓束帛之禮
其宴束帛爲好謂之宴貨

杜佑通典曰周制諸侯遣使聘天子皆以卿爲使大夫爲上介士爲衆介行聘明日發幣於公卿然後受饗受燕而還

壽祺謹案饗禮久亡經典閒言大饗而諸侯卿大夫士相爲國客之禮皆不備乾隆中秀水諸侍讀錦作補饗禮條理猶疎今以經傳參校之

周禮大宗伯曰以饗燕之禮親四方之賓客鄭注賓客謂朝聘者賈疏曰此饗燕謂上公三饗三燕侯伯再饗再燕子男一饗一燕饗烹大牢以飲賓獻依命數在廟行之燕者其牲狗行一獻四舉旅降脫屣升坐無算爵

以醉爲度行之在寢此謂朝賓若聘客則皆一饗其燕
與時賜無數考儀禮聘禮曰公於賓壹食再饗燕與羞
俶獻無常數賓介皆明日拜於朝上介壹食壹饗鄭注
饗謂烹大牢以飲賓也公食大夫禮曰設洗如饗則饗
與食互相先後也饗食賓介從饗獻矣復特獻之客之
也據此注則聘賓再饗聘介壹饗王禮與侯禮宜同禮
記聘義大戴禮朝事儀皆云壹食再饗燕與時賜所以
厚重禮也賈疏謂聘客皆一饗失之此食饗之數可攷
者也

周禮大行人凡大國之孤其他皆眡小國之君鄭注曰

此以君命來聘者也其他謂貳車及介牢禮賓主之間
擯者將幣祿酢饗食之數周禮又曰凡諸侯之卿其禮
各下其君二等以下及其大夫士皆如之鄭注曰此亦
以君命來聘者也所下其君者介與朝位賓主之間其
餘則自以其爵賈疏曰卿自各下其君二等若公之卿
以七侯伯卿以五子男卿以三也大夫又各自下卿二
等士牢禮之等又降殺於大夫周禮司儀曰凡四方之
賓客禮儀辭命餽牢賜獻以二等從其爵而上下之鄭
注曰爵卿也大夫也士也上下猶豐殺也賈疏曰爵尊
者禮豐爵卑者禮殺以二等爲豐殺也據此數文是諸

侯之臣入天子之國。天子待之之禮，皆從其爵爲之等。數卿下其君二等，大夫下卿，士下大夫，降殺以兩，差爲三等。掌客凡諸侯之禮，凡介行人宰史皆有殯饗餼，以其爵等爲之禮。鄭注：以爲此衆臣從賓者，爵卿也，則殯二牢，饗餼五牢，大夫也，則殯大牢，饗餼三牢，士也，則殯少牢，饗餼大牢，此降小禮，豐大禮也。賈疏：小禮謂殯大禮，謂饗餼卿五牢。子男卿與君等，是豐大禮也。以此注推之，卿饗餼五牢，與小國君同。則饗食亦然。公之卿當饗禮五獻，食禮五舉。侯伯卿當饗禮三獻，食禮三舉。左氏：昭公元年傳，鄭享趙孟，具五獻之邊豆於幕下。杜注：朝聘之制，大國之卿五獻，是也。

此飲獻之數可攷者也。

周禮公之卿下其君二等以七爲節侯伯卿以五子男卿以三而大國之孤其他皆眡小國之君以五爲節參差若此者鄭志答趙商問孤五而卿七曰卿奉君命故七介孤尊更自特見故五介此有聘禮可參據鄭志是大國之孤饗食當與卿同此孤卿之等可攷者也。

左氏襄二十七年傳宋人享趙文子叔向爲介司馬置折俎禮也孔氏正義引周禮大司馬饗食羞牲魚爲證考周禮大司馬乃王饗諸侯之禮饗客蓋小司馬爲之所謂掌事如大司馬之灋是也此置俎之官可攷者也。

左氏宣十六年傳言享有體薦宴有折俎公當享卿當
宴孔氏正義謂諸侯使卿來設享仍用燕法此饗客之
法可攷者也

國語言有百籩簋犧象尊彝鼎俎巾冪又有折俎加
豆酬幣宴貨以示容合好此饗客之物可攷者也

以上皆諸侍讀之書未及析言者參覈左氏內外傳燕
禮聘禮公食大夫禮約畧得其數法可補禮經之闕

九拜攷

周禮九拜之目自杜子春鄭大夫二鄭司農而後賈公彥孔冲遠陳用之顧亭林閻百詩毛大可惠仲孺江慎修方靈臯秦文恭段若膺諸家各有論說而皆未能盡協凌仲子最後出核矣然亦不無小疎攷周禮大祝上文辨六號辨九祭與此辨九拜相連類叙而總之曰以享右祭祀是九拜皆主祭祀而言賈疏謂九拜不專爲祭祀祭祀事重故舉而言之是也今據禮經少牢饋食有司徹特牲饋食士虞士喪旣夕諸篇證之雖言祭祀而覲聘燕射公食大夫冠昏喪鄉相見統諸此矣稽首

頓首空首三者皆吉禮祭祀之拜也振動吉拜凶拜三者皆喪禮祭事之拜也奇拜褒拜肅拜禮之殺也九者包上下賅吉凶兼男女無不取法於是焉

一曰稽首鄭注云稽首拜頭至地也說文擗首至地也從手舉舉音忽拜楊雄說拜從兩手下筭古文拜詣下

首也

段君徑改下首爲詣首非

見古文詣首如此賈疏云稽稽留之

字頭至地多時則爲稽首也又云稽首臣拜君法壽祺

按疏語未備稽首凡拜神拜尸皆然

鄭注以此屬褒拜不屬之稽首未核

少牢饋食曰祝酌奠主人西向祝在左主人再拜稽首祝祝主人又再拜稽首特牲饋食曰祝洗奠主人再拜

稽首祝在左主人再拜稽首此拜神也少牢饋食曰宿尸祝擯主人再拜稽首受黍特牲饋食曰主人左執角再拜稽首嗣舉奠盥入北面再拜稽首尸舉肝舉奠左執觶再拜稽首此拜尸卽拜神也士虞禮曰祝奠觶于鉶南主人再拜稽首又曰祭于苴主人再拜稽首此亦拜神也惟以神事尸故皆再拜稽首也

二曰頓首鄭注云頓首拜頭叩地也說文頓下首也壽祺按左氏僖五年傳孔疏云頓首頭不至地暫一叩之而已禮記檀弓疏引鄭曰頭叩地不停留也此平敵以下拜也說文及鄭周禮注解頓首疑與稽首無別禮記

疏引鄭注多不停留也四字較明左傳疏言頭不至地
尤確賈疏謂空首之時引頭至地首頓地卽舉非也賈
疏又引哀十七年孟武伯曰非天子寡君無所稽首襄
三年知武子曰天子在而君辱稽首寡君懼矣郊特牲
曰大夫之臣不稽首非尊家臣以避君也如是諸侯於
天子臣於君稽首禮之正諸侯相於大夫之臣及凡相
敵者皆當從頓首之拜凌氏禮經釋例云凡禮相敵之
拜皆頓首經不云頓首者文不具也案九拜惟稽首見經頓首吉拜凶拜
肅拜見傳記餘皆不具若左傳文七年晉穆嬴頓首於趙宣子則

小君於其臣且婦人也禮不應頓首定四年楚申包胥

年之喪以吉拜鄭注云稽顙而後拜曰喪拜拜而後稽顙曰吉拜鄭注周禮曰拜而後稽顙此殷之凶拜周以其拜與頓首相近故謂之吉拜稽顙而後拜謂三年服者注檀弓曰稽顙而後拜此周之喪拜也凌氏曰考之禮經但有拜稽顙而無稽顙拜之文則拜而後稽顙其周禮與鄭以爲殷之喪拜似與經未合也段君云鄭言殷喪禮周喪禮未知所據檀弓記晉文公事云稽顙而不拜國語云拜而不稽首是檀弓未可爲先稽顙後拜之證竊意拜後稽顙自是周禮孔子曰稽顙而後拜頗乎其至也三年之喪吾從其至者則謂稽顙後拜爲殷

禮似近之壽祺謂吉拜凶拜施於喪事之祭則士虞主人及祝拜妥尸亦吉拜也主人醑尸尸拜主人北面答拜亦凶拜也鄭注云主人北面以醑酢變吉也下疏云吉祭時主人西面故上注云北面以醑酢變吉也是也七曰奇拜鄭大夫云奇拜謂一拜也段君云凡禮經言拜不言再拜者皆謂一拜也凌氏云奇拜頓首空首皆有之鄉飲所謂一拜者卽頓首之奇拜也燕大射所謂公答一拜者卽空首之奇拜也壽祺按少牢饋食曰主人西面三拜養者養者奠爵皆答拜皆祭酒卒爵奠爵皆拜主人答一拜鄭注云答一拜略也疏云四養皆拜

主人總答一拜故云略也有司徹曰主人拜眾賓于門東三拜眾賓門東北面皆答一拜鄭注云眾賓一拜賤也此皆祀事之奇拜也或曰奇特也士喪禮曰大夫特拜士旅之又曰凡異爵者拜諸其位鄭注云就其位特拜也疏云特拜一一拜諸其位也喪大記曰夫人特拜命婦汎拜眾賓於堂上是故謂之奇拜也

八曰褒拜鄭大夫云褒讀爲報報拜再拜是也案樂記禮有報而樂有反鄭注云報讀爲褒是褒報古通凌氏云凡再拜謂之褒拜段君云褒大也有所多大也褒拜謂再拜以上也凡禮經言三拜及左傳或言三拜或言

三拜稽首皆是也

以上段氏說

或曰褒進也進而有加也鄭

注云褒拜拜神與尸也考少牢饋食曰尸醑主人主人拜受爵尸答拜主人西面奠爵又拜此所謂俠拜也鄭注云主人受酢酒俠爵拜爵彌尊尸也此有加進之義故謂之褒拜也壽祺按奇拜者拜而無答拜也少牢饋食曰宿尸主人又再拜稽首主人退尸送揖不拜又曰尸不飯告飽主人不言拜侑又曰尸出主人送于廟門之外拜尸不顧

凡送賓皆不顧

又曰尸醑主人拜受爵尸答拜

主人西面奠爵又拜此皆主人拜而尸不答拜所謂奇拜也又凡君於士不答拜聘使君若迎拜不敢答拜喪

賓不答拜爲人使不答拜

見曲禮經注及聘禮

送賓門外不答拜

亦奇拜也褒拜者答拜而有備有略也少牢饋食曰饔者皆拜主人答一拜又主人拜衆賓於門東三拜衆賓皆答一拜所謂略也特牲饋食曰衆賓升拜受爵主人備答拜焉所謂備也然則奇拜褒拜以不答拜與答拜別不專以一拜再拜三拜別也

九曰肅拜先鄭司農云肅拜但俯下手今時擡是也介者不拜故曰爲事故敢肅從者賈疏云肅拜最輕惟軍中有此肅拜婦人亦以肅拜爲正壽祺按說文擡舉首下手也

首字本亦誤作手據左傳疏成十六年釋文引字林改之

鄉飲酒禮賓厭介

入門左介厭眾賓入眾賓皆入門左注云推手曰揖引手曰厭今文皆作揖疏云厭或作擅古字義通段君以爲傳所謂肅者今人長揖也卻至之肅與禮之肅拜有跪不跪之殊肅拜者跪而舉頭下手也揖者立而舉頭推手也肅者立而低頭下手如今人之揖也司農稱左傳證周禮失之以上段氏說然禮婦人之拜皆與男子之拜皆坐特牲少牢有司徹丈夫之拜皆坐而奠爵然後拜士昏禮姑婦皆與拜特牲饋食禮主婦自醕左執爵拜有司徹主婦授尸酢立卒爵執爵拜注云執爵拜變於男子也是婦人肅拜皆不跪也男子肅拜亦如之宋王

貽孫謂婦人不跪始於武后固誤

見困學紀聞

段君謂肅拜

有跪亦非也少儀曰婦人雖有君賜肅拜爲尸坐則不手拜肅拜爲喪主則不手拜鄭注云肅拜拜不低頭也韋昭注晉語云肅拜下手至地也是肅拜之法也士昏禮曰婦拜扱地是婦人手拜之法也九拜專主祭祀而該上下包吉凶兼男女是大祝所以辨也

杜子春謂奇拜先屈一膝今雅拜是也或云奇讀曰倚倚拜謂持節持戟拜身倚之以拜案此引漢制以況周禮恐古無是儀經傳未有及之者也鄭大夫讀動爲董謂振董以兩手相擊也兩手相擊近於古之扞舞非拜

也先鄭以褒拜今時持節拜亦於古無徵後鄭謂振動戰栗變動之拜引書曰王動色變此古文太誓之詞然無涉於拜也陳用之言頓首首頓於手而已空首首不至於手空其首而已皆非也顧亭林引李陵報蘇武書稱頓首此書晉人贗作顧援以證經陋矣閻百詩以褒拜爲今之兩揖再拜稽首爲頭一至地以論語所謂拜止是揖所謂揖皆今之拱手卽周官之肅拜以孟子之稽首再拜而不受爲用凶拜其外謬最甚惠仲孺謂稽首頓首皆頭至手而不至地以拜手爲手在地首在手以空首猶稽首降拜降拜故謂之空以振動爲舞蹈皆

誤江慎修以頓首不常用惟有急求人乃用之亦俗解
禮豈爲急求於人而設乎方靈臯以振動如聘禮賓入
門公再拜賓辟公當楯再拜賓三退負序其時必振動
以示不敢答拜而震懾不甯更甚於答拜秦文恭五禮通考
以吉拜凶拜爲稽首之差異皆臆說也段君以頓首與
稽顙爲一謂頓首未有不用於凶者則太創而駭人又
以振動爲有不必拜手而拜手者有不必稽首而稽首
者有不必頓首而頓首者皆謂之振動以凶拜卽拜稽
顙之先後與其自言頓首重複以單言拜爲空首亦不
確段所引文三年魯公降拜襄四年穆叔三拜昭九年

左傳卷五
穆叔子皮及曹大夫與拜昭十六年子產拜使五卿皆拜此皆因事而拜自降拜外率亦常事不足爲振動也又引稽首十四事雖併非常之舉然未有戰栗非常之容也又以宿尸之再拜稽首爲振動失之

經傳中又有拜之異者穆天子傳許男降再拜空首此宜稽首而曰空首恐穆傳僞書不足據也檀弓公子重耳稽顙而不拜以不爲後也禮拜賓必喪主不爲後則不爲喪主也左氏昭三十五年季孫意如稽顙於叔孫昭子此亦稽顙而不拜以逐君自表其哀戚也昭八年陳無宇稽顙於欒施以僞助欒氏故自貶也吳語諸稽

郢行成於吳曰頓顙于邊以有求於大國也公羊昭二
十五年子家羈再拜顙于齊侯以失國故自表其哀戚
如有重喪也此卽稽顙之拜也何休曰顙者猶今叩頭
鄭注周禮以頓首爲頭叩地似未審矣道光九年己丑
孟冬與樅兒譚經義因共討論之如此樅兒別有九拜
辨一篇解空首爲席上之拜甚精

大小戴禮記攷

劉向別錄古文記二百四篇

見經典釋文序錄

漢書藝文

志記百三十一篇

漢書藝文志禮家記百三十一篇班固本注七十子後學者所記景十三王傳曰河間獻王所得書皆古文先秦舊書周官尙書禮禮記孟子老子之屬皆經傳說記七十子之徒所論又曰魯恭王壞孔子宅而得古文尙書及禮記論語孝經凡數十篇皆古字也經典釋文序錄引鄭君六藝論云後得孔氏壁中河間獻王古文禮五十六篇記百三十一篇周禮六篇又引劉向別錄云

古文記二百四篇壽祺案孔壁所得書魯恭王傳僅言數十篇知非全書藝文志依七畧著錄記百三十一篇蓋河間獻王所得者故六藝論兼舉之百三十一篇之記合明堂陰陽三十三篇王史氏二十一篇樂記二十三篇孔子三朝記七篇凡二百十五篇並見藝文志而別錄言二百四篇未知所除何篇疑樂記二十三篇其十一篇已具百三十一篇記中說見後除之故為二百四篇孔子三朝記亦重出不除者篇名不同故也大戴禮記所載七篇為千乘四代虞敦德誥志小辯用兵少閒不著孔子三朝記之名隋志言劉向考校經籍檢得一百三十篇向因第而敘之又得明堂陰陽

記孔子三朝記王氏史氏記樂記五種合二百十四篇
減少一篇與別錄藝文志不符失之然百三十一篇之
記第之者劉向得之者獻王而輯之者蓋叔孫通也魏
張揖上廣雅表曰周公著爾雅一篇爰暨帝劉魯人叔
孫通撰置禮記文不違古通撰輯禮記此其顯證雅讓
之言必有所據爾雅爲通所採當在大戴記中武進臧庸曰白虎通三綱六紀篇引禮親屬記見爾雅釋親孟子帝館甥于貳室趙岐注引禮記亦釋親文風俗通聲音篇引禮樂記乃釋樂文公羊宣十二年注引禮乃釋水文則禮記中有爾雅之文矣通本秦博士親
見古籍嘗作漢儀十二篇及漢禮器制度而禮記乃先
秦舊書聖人及七十子微言大義賴通以不墜功亞河

間漢志禮家闕其書且沒其名何也

隋書經籍志大戴禮記戴德撰小戴

禮記戴聖撰此題亦誤

大戴記八十五篇 小戴記四十九篇

禮記正義引六藝論云戴德傳記八十五篇則大戴禮是也戴聖傳記四十九篇則此禮記是也壽祺案二戴所傳記漢志不別出以其具於百三十一篇記中也樂記正義引別錄有禮記四十九篇此即小戴所傳則大戴之八十五篇亦必存其目蓋別錄兼載諸家之本視漢志為詳矣經典釋文序錄引陳邵晉司空長史周禮論序云戴德刪古禮二百四篇為八十五篇謂之大戴禮戴

聖刪大戴禮爲四十九篇是爲小戴禮後漢馬融盧植
考諸家同異附戴聖篇章去其錄重及所敘畧而行於
世卽今之禮記是也邵言微誤隋書經籍志因傳會謂
戴聖刪大戴之書爲四十六篇馬融足月令明堂位樂
記爲四十九篇休宣戴東原辨之曰孔穎達義疏於樂
記云按別錄禮記四十九篇後漢書橋玄傳七世祖仁
著禮記章句四十九篇號曰橋君學仁卽班固所說小
戴授梁人橋仁季卿者也劉橋所見篇數已爲四十有
九不待融足三篇甚明康成受學於融其六藝論亦但
曰戴聖傳禮四十九篇作隋書者徒謂大戴闕篇卽小

戴所錄而尙多三篇遂聊歸之融耳壽祺案橋仁師小戴後漢書謂從同郡戴德學亦誤又曹褒傳父充持慶氏禮褒又傳禮記四十九篇教授諸生千餘人慶氏學遂行於世然則褒所受於慶普之禮記亦四十九篇也二戴慶氏皆后倉弟子惡得謂小戴刪大戴之書耶釋文序錄云劉向別錄有四十九篇其篇次與今禮記同然則謂馬融足三篇者妄矣

大小戴記並在記百三十一篇中

錢詹事大昕漢書考異云小戴記四十九篇曲禮檀弓雜記皆以簡策重多分爲上下實止四十六篇合大戴

之八十五篇正協百三十一篇之數壽祺案今二戴記有投壺哀公問兩篇篇名同大戴之曾子大孝篇見小戴祭義諸侯釁廟篇見小戴雜記朝事篇自聘禮至諸侯務焉見小戴聘義本事篇自有恩有義至聖人因殺以制節見小戴喪服四制其它篇目尙多同者漢書王氏傳稱驪駒之歌在曲禮服虔注云在大戴禮五經異義引大戴禮器毛詩豳譜正義引大戴禮文王世子唐皮日休有補大戴禮祭法又漢書韋元成傳引祭義白虎通畊桑篇引祭義曾子問情性篇引閒傳崩薨篇引檀弓王制蔡邕明堂月令論引檀弓其文往往爲小戴

記所無安知非出大戴二篇中如投壺釁廟之互存而各有詳畧乎大戴記二篇四十七唐人所見已然白虎通引禮諡法王度記三正記別名記親屬記五帝記少牢饋食禮注引禘于太廟禮疏云大戴禮文周禮注引王霸記明堂月令論引召穆篇風俗通引號諡記論衡引瑞命篇毛詩靈臺正義引政穆篇即召穆篇彼汾正義引大戴禮辨名記即別名記文選注引禮瑞命記即瑞命篇皆大戴逸篇其他與小戴出入者畧可舉數豈能彼此相足竊謂二戴於百三十一篇之說各以意斷取異同參差不必此之所棄卽彼之所錄也

王制月令樂記非秦漢之書

儒者每言王制漢博士作月令呂不韋作或又疑樂記

出河間獻王皆非事實也禮記王制正義引盧植云漢

孝文皇帝令博士諸生作此書

經典釋文引同

攷盧氏說出史

記封禪書封禪書曰文帝召魯人公孫臣拜爲博士與

諸生草改厯服色事明年使博士諸生刺六經作王制

謀議巡守封禪事然今王制無一語及封禪言巡守者

特一端耳司馬貞史記索隱引劉向別錄云文帝所造

書有本制兵制服制篇以今王制參檢絕不相合

鄭君三禮

目錄云名曰王制者以其記先王班爵授祿祭祀養老之法度

此則博士所作王制或

在藝文志禮家古封禪羣祀二十二篇中非禮記之王

制也鄭君駁五經異義云王制是孔子之後大賢所記
先王之事答臨孝存周禮難云孟子當赧王之際王制
之作復在其後斯言得之月令正義引鄭目錄云月令
者本呂氏春秋十二月紀之首章以禮家好事抄合之
後人因題之名曰禮記言周公所作壽祺案正義云賈
逵馬融之徒皆云月令周公所作故王肅用焉後漢書
魯恭傳恭議曰月令周世所造而所據皆夏之時也蔡
邕明堂月令論曰周書七十一篇而月令第五十三秦
相呂不韋著書取月令爲紀號淮南王安亦取以爲第
四篇改名曰時則故偏見之徒或云月令呂不韋作或

云淮南皆非也隋書牛宏傳今明堂月令者蔡邕王肅
云周公所作周書內有月令第五十三卽此魏鄭公諫
錄月令起於上古呂不韋止是修古月令未必始起秦
代也此則禮記月令非呂不韋著審矣唐書大衍厯議
云七十二候原於周公時訓月令雖頗有增益然先後
之次則同僧一行親見周書月令有七十二候則與禮
記月令無異益信蔡邕之言不妄也鄭君以爲禮家抄
合殆失之又鄭謂三王官無太尉秦官則有以此斷月
令爲呂氏書案月令命太尉呂覽尉作封然則禮記亦
當本作命大封卽易通卦驗所謂夏至景風至拜大將

封有功之義

見太平御覽引

其作太尉者淮南時則依漢制改

而禮家從之非其舊也論語集解馬融曰周書月令有

更火之文春取榆柳之火夏取棗杏之火季夏取桑柘

之火秋取柞櫟之火冬取槐檀之火牛宏引周書月令

論明堂之制殿垣方在內水周於外水內徑三百步孔

氏尚書正義引周書月令云三日粿肫與漢書律志載

劉歆三統曆引古文月采篇曰三日曰肫適合粿曰古

通月采卽月令之譌也是自漢迄唐諸儒及見周書月

令篇而所引有出於十二月紀之外者則禮記所未取

也樂記者藝文志云河間獻王與毛生等共采周官及

諸子言樂事以作樂記其內史丞王定傳之以授常山王禹禹成帝時爲謁者獻二十四卷記劉向校書得樂記二十三篇與禹不同而班志兩載其書曰樂記二十三篇王禹記二十四篇案漢書食貨志王莽下詔曰樂語有五均鄧展注曰樂記樂元語河間獻王所傳道五均事臣瓚曰其文云天子取諸侯之士以立五均則市無二價而民常均強者不得困弱富者不得要貧則公家有餘恩及小民矣白虎通禮樂篇亦屢引樂元語此卽獻王所傳樂記二十四篇之一篇也三禮目錄於禮記樂記云此於別錄屬樂記謂屬二十三篇之樂記也

禮記正義云蓋十一篇合爲一篇謂有樂本有樂論有樂施有樂言有樂禮有樂情有樂化有樂象有賓牟賈有師乙有魏文侯劉向所校二十三篇著於別錄今樂記斷取十一篇餘有十二篇其名猶在案別錄十一篇餘次奏樂第十二樂器第十三樂作第十四意始第十五樂穆第十六說律第十七季札第十八樂道第十九樂義第二十昭本第二十一昭頌第二十二竇公第二十三是也按別錄禮記四十九篇樂記第十九則樂記十一篇入禮記在劉向前矣正義言如此則今禮記中之樂記非王禹樂記甚審史記正義云樂記者公孫尼

子次撰也此言必本之別錄七畧樂記出公孫尼子而有竇公篇者竇公本魏文侯樂人年百八十歲至漢文帝時猶存此篇或載其在文侯時論樂事也別錄於二百四篇偁爲古文記漢書河間獻王傳魯恭王傳兩稱禮記皆統以古文魯恭王傳又特明之曰皆古字也河間獻王傳且明言七十子之徒所論是惡得有秦漢作者之文廁其間邪後儒動訾禮記雜出漢儒不攷甚矣

夏小正考

宋傅崧卿序夏小正謂隋志有夏小正一卷漢唐志旣錄戴氏禮此書宜不別見意隋重賞以求逸書進書者離析篇目而爲此壽祺竊不謂然史記五帝本紀云孔子所傳宰予問五帝德及帝繫姓儒者或不傳夏本紀云學者多傳夏小正此三篇皆在百三十一篇記中太史公時二戴未出於五帝德帝繫姓云或不傳而於夏小正云學者多傳則當時此篇顯有專行者如士禮十七篇傳自高堂生而喪服一篇漢以來諸儒多爲注解別行於世見隋經籍志戴德先有喪服變除見通典禮

四十一是其證也。崧卿又謂小正之傳戴德所撰。案鄭君六藝論云：戴德傳禮八十五篇。言傳則述而不作。夏小正有傳，始如喪服有子夏傳由來久矣。爾雅釋蟲郭注引夏小正傳曰：蜋蜋者五采具。又引傳：蟪蛄者蛄。邵編脩晉涵爾雅正義云：夏小正舊不分經傳。郭注釋艸引夏小正曰：藹也者莎。藹者其實亦不稱爲傳。此云夏小正傳是晉初卽有分經傳者。傳崧卿本分析經傳本於郭氏。邵氏言如此。今攷吳陸機毛詩義疏引大戴禮夏小正傳曰：藹遊胡遊胡。勃也。見左傳隱三年正義。則三國時有傳名也。蔡邕明堂月令論引大戴禮夏

小正傳曰陰陽生物之候王事之次今夏小正傳無此文蓋傳本異則漢時已有傳名也鄭康成月令注引夏小正曰九月丹鳥羞白鳥九月當爲八月說曰丹鳥也者謂丹良也白鳥也者謂閭蚋也其謂之鳥者重其養者也有翼爲鳥養也者不盡食也鄭君亦以經與傳說兩分之不始於璞明甚

齊詩

王應麟詩攷按輯魯齊韓三家詩用志良善惟誤採董
迫齊詩故信以爲真則非也齊詩亡於魏惟王吉匡衡
翼奉諸人傳齊詩見漢書本傳奏疏所引者可據外如
地理志齊地條云詩風齊國是也臨淄名營丘故齊詩
曰子之營兮遭我乎嶸之間兮師古曰齊國營詩之詞
也毛詩作還齊詩作營按班固所云齊詩者謂齊國之
詩與上文稱函詩秦詩邶詩唐詩鄭詩陳詩爲一例非
謂齊轅固生所傳也小顏於此及下引自杜沮漆皆指
稱齊詩不知何據然觀藝文志云魯最爲近之又班固

撰白虎通用魯說則漢書所引恐是魯詩固之伯祖伯少受詩於師丹語說有法師丹爲匡衡弟子傳齊詩固或世其家學釋文還韓詩作姬則作營者必齊魯之說也又引說文云嶧山在齊崔集注本作嶧崔本與漢志合然陸德明亦不能定其爲齊爲魯小顏何以知齊詩作營也小顏於地理志郁夷下引韓詩而韓詩實不作郁夷其言多舛謬不足信

詩有六情五際解

漢書翼奉傳奉上封事曰臣聞之於師治天下之術在於六情十二律而已北方之情好也好行貪很申子主之東方之情怒也怒行陰賊亥卯主之二陰並行是以王者忌子卯也南方之情惡也惡行廉貞寅午主之西方之情喜也喜行寬大巳酉主之二陽並行是以王者吉午酉也上方之情樂也樂行姦邪辰未主之下方之情哀也哀行公正戌丑主之辰未屬陰戌丑屬陽萬物各以其類應又奏封事曰臣聞之於師易有陰陽詩有五際春秋有災異皆列終始推得失考天心以言王道

之安危孟康注引詩內傳曰五際卯酉午戌亥也陰陽終始際會之歲於此則有變改之政也壽祺案奉治齊詩兩舉師說六情五際皆齊詩說孟康引詩內傳者齊詩內傳文也太平御覽引春秋演孔圖曰詩含五際六情宋均注曰六情節六義也一曰風二曰賦三曰比四曰興五曰雅六曰頌以翼奉傳攷之則宋均之釋六情非齊詩本義也毛詩大序正義釋六情據翼奉說應劭注漢書以君臣父子兄弟夫婦朋友釋五際亦非齊詩本義也後漢書郎顗傳引詩汎厯樞曰卯酉爲革政午亥爲革命神在天門出入候聽李賢引宋均注云神陽氣君象也天門

戊亥之間。乾所據者。毛詩大序正義引詩緯汎厯樞以
釋五際云。亥爲革命一際也。亥又爲天門。出入候聽二
際也。卯爲陰陽交際三際也。午爲陽謝陰興四際也。酉
爲陰盛陽微五際也。然齊詩五際並數戌。而詩疏不及
之。亦非。據郎顗傳注。戌亥皆爲天門。亥爲革命。當一際。
則出入候聽宜以戌當一際矣。太平御覽引詩含神霧
曰。集微揆著。上統元皇。下序四始。羅列五際。宋均注曰。
集微揆著。若縣縣瓜瓞。人之初生。揆其始。是必將至。著
有天子也。此齊詩五際之義也。文選文賦注引春秋演
孔圖云。詩含五際六情。絕於申。宋均注申。申公也。壽祺

謂申公之學爲魯詩五際六情之說出齊詩與申公無涉或云絕於申者絕於魯也絕於魯者蓋尊齊而絀魯之辭也詩緯言陰陽術數與齊詩相傳疑魯齊弟子有互爲是非者故詩緯之言如此此說未當攷毛詩采薇正義引汎厯樞云陽生酉仲陰生戌仲絕於申者謂五際之道陽氣至申而絕至酉始生也宋均注誤解耳

魯有文王廟說

左氏襄十二年傳吳子壽夢卒臨於周廟禮也魯爲諸姬臨於周廟爲邾凡蔣茅胙祭臨於周公之廟杜預注周廟文王廟也周公出文王故魯立其廟或疑魯立文王廟經無明文今詳左氏此傳以周廟與周公之廟對舉非文王廟而何史記魯周公世家周公卒後成王開金縢書於是乃命魯得郊祭文王然則魯立文王廟在魯公伯禽時薛尚功鐘鼎款識周器有魯公鼎銘曰鹵公作文王尊彝鹵古文魯字鼎者宗廟彝器故亦可爲尊彝此魯公祭文王廟之驗也禮記郊特牲鄭注魯以

周公之故立文王廟正義引異義古春秋左氏說天子之子以上德爲諸侯者得祀所自出魯以周公之故立文王廟許慎謹案周公以上德封於魯得郊天兼用四代之禮樂知亦得祖天子鄭氏無駁與許同杜注左氏實本諸此壽祺謂魯祭文王猶宋祖帝乙鄭祖厲王左氏年傳文三左氏昭十八年傳鄭人救火使祝史徙主祐于周廟杜注周廟厲王廟也哀二年崩黷禱曰敢昭告皇祖文王似衛亦得祭文王周禮夏官祭僕凡祭祀王之所不與則賜之禽都家亦如之鄭注王所不與謂同姓有先王之廟疏云畿外同姓諸侯魯衛之屬是也此皆經

典明證竹書紀年成王十三年夏六月魯大禘于周公廟案紀年成王二十一年周文公薨于豐則此非周文公廟矣徐文靖竹書統箋以爲周公亶父周公季厯之廟大繆魯安得更有亶父季厯之廟乎紀年文當作周廟公字誤衍或不學者所加薛尙功釋魯公鼎爲周公作祭文王之器亦誤

過位升堂解

論語鄉黨篇記入公門訖復其位蹶階如也。文次君召使擯章之後，執圭章之前，此謂將聘圖事之禮也。公門據已國過位，謂路門內臣之朝位。升堂謂與君圖事於堂也。何以明之？曲禮曰：下鄉位。鄭氏注：鄉位，卿之朝位也。君出過之而上車，入未至而下車。孔氏正義曰：卿位，路門之內門東北面位。故論語鄉黨云：入公門，又云過位，色勃如也。注：過位，謂入門右北面君揖之位。壽祺謹案：正義引注者，鄭氏論語注文。余正釋官曰：門屏之間，謂之宁。中庭之左右，謂之位。說文弟八人篇位解曰：列

中庭之左右謂之位。从人立。鄭據古訓釋過位之位爲入門右北面君揖之位。至精不可易也。所以知在路門內者。燕禮大射儀卿大夫皆入門右北面東上。公降立阼階東南。南嚮揖卿大夫。卿西面北上。大夫皆少進。賈氏燕禮疏曰。卿大夫入門右北面東上。此是擬君揖位。君爾之始就庭位。是路門內有此面位也。觀曲禮下卿位。知君出入過之猶敬。而況臣乎。所以知此經過位升堂爲圖事時者。聘禮君與卿圖事。鄭注。謀事者必因朝。其位。君南面。卿西面。大夫北面。士東面。疏以爲在路門外正朝。江處士永鄉黨圖考以爲下經旣受行出。遂見

宰問幾月之資注云古者君臣謀密艸觚未不知所之遠
近則圖事命使當在路寢之朝後夕幣乃在路門外正
朝士相見禮凡燕見于君必辯君之南面若不得則正
方不疑君鄭注君南面則臣見正北面君或時不然當
正東面若正西面不得疑君所處邪嚮之此謂特見圖
事非立賓主之薄也士相見禮又曰君在堂升見無方
階辯君所在鄭注升見升堂見於君也君近東則升東
階君近西則升西階賈疏曰亦謂及燕及圖事之法疏
又曰知有圖事者論語鄉黨云孔子與君圖事於庭圖
事於堂聘禮亦云君與卿圖事之時有此面位無常法

也。案疏。僂聘禮云者。約鄭聘禮注文。僂鄉黨云者。約鄭論語鄉黨注文。是鄭以圖事解鄉黨與聘禮合也。圖事之法。面位無常。故有過位之事。過位則圖事於庭也。有圖事故曰其升堂則圖事於堂也。聘禮又曰。遂命使者。使言似不足者再拜稽首辭。君不許。乃退。鄭注。反位也。此論語復其位之事。士相見禮疏曰。此庶人見君不趨翔。論語是孔子行事。而云趨進翼如也。彼謂孔子與君圖事於堂。圖事訖降堂。何時揖處。至君前橫過向門。特加肅敬。此賈氏本鄭義說。論語出降階趨進之事也。然則過位升堂審爲將聘圖事。故下章承之。遂言行聘執圭之儀服虔

左氏傳解詁所謂孔氏聘辭卽此類矣或見聘禮記注引孔子之升堂至沒階趨進翼如也上下又引孔子之於執圭孔子於享禮爲證玉藻賓入不中門不履闕其文亦與鄉黨答因以論語入公門訖復其位爲卽行聘時事然公門之名非所施於它國聘禮賓入由大門而庸門非路門且入門左非門右公揖入每門每曲揖則無專位惟私覲入門右於此豫見則乖其事次執圭升西楹西則未暇攝齊義皆不與鄉黨相應聘禮注錯引此經乃舉事以見例不得淵而一之學者守鄭論語本注爲宗可也

紺緇紅紫解

論語君子不以紺緇飾紅紫不以爲褻服何晏集解引孔安國曰一入曰緇飾者不以爲領緣也紺者齊服盛色以爲飾衣似衣齊服緇者三年練以緇飾衣爲其似衣喪服故皆不以爲飾衣皇邢兩疏皆不能辨朱子集注因之婺源江氏慎修始正其失云齊時服元冠元端而孔云齊服是誤以紺爲元矣練衣本以一染之緇爲緣而孔云練服是誤以緇爲緇矣紺緇皆赤黑之間色不以者謂其非正色也自是說論語者多從江氏然察之則殊不然考工記五入爲緇爾疋一染謂之緇檀弓

練練衣黃裏縗緣孔豈不讀考工記檀弓爾疋而誤以
縗爲縗乎邢昺疏亦疑孔云一人曰縗未知出何書云
三年練以縗飾衣似讀縗爲縗殊不知孔氏本經必作
縗不作縗故有是言孔所傳論語乃古文後來傳寫經
注皆誤縗爲縗而非孔誤也江氏謂紺縗皆赤黑之間
色亦不確古者衣正色裳間色故士黃裳纁裳雜裳可
也間色非不可用士冠禮爵弁鄭注爵弁者冕之次其
色赤而微黑如爵頭然或謂之縗考工記鍾氏鄭注縗
今禮俗文作爵言如爵頭色也周禮巾車注雀黑多赤
少之色則縗卽爵弁之色何謂間而非正縗爵聲近說

文無緇有纁云帛雀頭色一曰微赤色如紺纁淺也讀
若讒从糸彘聲然則纁亦緇字也說文無緇孔本論語
乃古文亦不當有緇字其本經必作纁無疑矣溧陽周
柄中據禮記深衣篇具大父母父母衣純以纁具父母
衣純以青孤子衣純以素謂紺緇非纁又非青素於盡
飾無飾之義兩無所取故不用此說是也爾疋一染謂
之纁再染謂之緇一作纁見考工記注先鄭引三染謂之纁考工記
三入爲纁五入爲緇七入爲緇其義相同考工記無四
入六入之文鄭君約之以朱爲四入元爲六入見士冠禮注
賈公彥一禮疏並云以纁入黑則爲紺以紺入黑則爲

緇鄭君注云纁再染以黑則爲緇緇復再染以黑乃成
緇又謂此同色耳凡元色者在緇緇之間其六入者與
蓋鄭君據禮推而知之也皇侃論語義疏引鄭君論語
注云紺緇紫元之類也紅纁之類也元纁所以爲祭服
等其類也紺緇木染不可爲衣飾紅紫草染不可爲褻
服而已飾謂純緣也是鄭不以紺緇爲間色其言元纁
爲祭服紺緇紅紫等其類與孔氏齊服說合可證孔說
不誤惟經文緇作纁爲異耳鄭君以紺緇木染紅紫草
染不可爲衣飾與褻服者按周禮地官序官掌染草注
云染艸藍蒨象斗之屬其下掌染草注云染草茅蒐橐

蘆豕首紫蒴之屬疏云藍以染青蒨以染赤象斗染黑
大司徒土會之法山林其植物宜阜物先鄭以爲阜物
柞栗之屬說文栲其實阜一曰樣爾疋釋木栲杼櫟其
實栲陸璣毛詩疏云徐州人謂櫟爲杼或謂之爲栲其
子爲阜或言阜斗其殼爲汁可以染阜此木染之證也
爾疋釋草蒴鼠尾郭注可以染阜漆虎杖郭注可以染
赤茹蘆茅蒐郭注今之蒨也可以染絳樓烏階郭注可
以染阜藐苾草郭注可以染紫一名苾莫說文藍染青
草也此草染之證也考工記鍾氏掌染羽以朱湛丹秫
三月而熾之淳而漬之周禮天官染人掌染絲帛凡染

春瀑練夏纁元秋染夏鄭注云元纁者天地之色以爲祭服石染當及盛暑熱潤始湛研之三月而後可用考工記鍾氏則染纁術也染元則史傳闕矣染夏者染五色是鄭意以祭服宜石染染纁元夏法皆不用草木蓋草木染者可施之他物祭服元纁象天地之色則當用石染貴之也禮記玉藻元冠紫綏自魯桓公始也左氏哀十七年傳衛渾良夫衷牡紫衣狐裘太子數之以三罪而殺之杜注紫衣狐裘人君之服可見春秋時人君正服多用紫矣紺緹紫類祭服之元紅類祭服之纁然紺緹木染紅紫草染故亦不用爲飾及褻服此鄭義也

洪範惟十有三祀解

漢書律志曰三統上元至伐紂之歲十四萬二千二百九歲歲在鶉火張十三度文王受命九年而崩再期在大祥而伐紂故書序曰惟十有一年武王伐紂大誓八百諸侯會還歸二年乃遂伐紂克殷以箕子歸十三年也故書序曰武王克殷以箕子歸作洪範洪範篇曰惟十有三祀王訪于箕子自文王受命而至此十三年歲亦在鶉火故傳曰歲在鶉火則我有周之分曆也文王十五而生武王受命九年而崩崩後四年而武王克殷克殷之歲八十六矣後七年而崩故禮記文王世子

曰文王九十七而終武王九十三而終凡武王在位十一年此古文家說尙書者以十有三祀並文王受命之年數之也尙書大傳曰武王以朝鮮封箕子箕子既受周之封不得無臣禮故於十三祀來朝武王因其朝而問洪範今文家說尙書事實雖殊其言十三祀一也史記周本紀九年武王東觀兵至於孟津乃還師歸十一年陳師牧犂已克殷後二年間箕子殷所以亡箕子不忍言殷惡以存亡國宜告武王亦醜故問以天道其年與漢志不同然周本紀云十一年十二月戊午師畢渡孟津二月甲子昧爽武王朝至商郊牧犂則是周之十

二年春矣下言已克殷後二年問箕子乃自十二年二月數之亦適合十有三祀也風俗通皇霸篇亦引洪範惟十有三祀與漢志合是漢人相傳尙書舊本古今所同無可疑也近有吳門學究吳簡舟乃妄逞私臆點竄古經以爲古篆三月己巳與十有三祀近洪範十有三祀乃三月己巳之誤不知尙書篇首雖有某月某日之書例而洪範一篇漢人相傳至今從無古篆差譌之說何得鑿空怪誕變亂於數千載之後而自矜剏獲也且吳氏不考三統厯法亦知此三月己巳爲武王何年乎欲謂克殷後之二年是歲不得有三月己巳欲謂克殷

之年依三統厯是歲三月二日庚申十一日得有己巳

而古文武成云惟一月壬辰旁死霸二若翌日癸巳日三

武王廼朝步自周于征伐紂惟二月既死霸粵五日甲

子咸劉商王紂惟四月既旁生霸粵六日庚戌武王燎

於周廟翌日辛亥祀於天位粵五日乙卯乃臣庶國祀

馘於周廟計周師初發以殷十一月戊子一月癸巳爲

周正月三日武王始發丙午逮師逮漢志刻作還誤至二月癸

亥爲周二月三日廼至牧壄孟津去周九百里師行三

十里故戊子師發至戊午三十一日而度孟津牧壄又

踰百餘里武王以癸巳始發十四日丙午逮師至癸亥

亦三十一日而至牧櫟大兵之歸必當至三月朔後其
時告廟獻馘大事未舉若是月十一日己巳距師還僅
及數朝倉卒之間豈遑訪道必不然矣尙書大傳與史
記皆以文王受命七年而崩故以九年觀兵十一年克
殷後二年間箕子徐廣引譙周云史記武王十一年東
觀兵十三年克紂似譙周所見史記與漢志合而下文
云克殷後二年又與洪範十有三祀之言乖則譙周之
言未足據也班固云遷書載堯典禹貢微子洪範金縢
多古文說此謂其說義多從古文耳至於文字則悉主
今文尙書如九年觀兵十一年伐紂是从尙書大傳文

王七年而崩之說也九年觀兵者以文王受命七年而崩故武王再朞而觀兵以下諸侯之心以俟殷紂之改過也十一年伐紂者前此九年孟津之會八百諸侯皆曰紂可伐矣武王曰女未知天命未可伐也故還歸及十一年始伐紂克之也

史記周本紀文王受命七年今本譌七爲十張守節正義誤謂

「當爲九此未知史從尙書傳也」

尙書傳亦有可證者史記宋微子世

家述洪範畢云於是武王乃封箕子於朝鮮而不臣也漢書五行志云周既克殷以箕子歸武王親虛己而問焉周本紀於牧豎之事下云己而命召公釋箕子之囚乃罷兵西歸封諸侯下又云己克殷後二年問箕子此

與尚書傳大意相近今文家說未可非與古文並存可也再考逸周書柔武解曰惟王元祀一月既生魄孔晁注此文王卒之明年春也大武解曰惟王一祀二月此一祀卽元祀王謂武王之心開武解曰維王二祀一月既生魄寶典解曰維王三祀唐書引作元祀蓋誤二月丙辰朔鄆謀解曰惟王三祀孔晁注此文王受命至此十年也案十年當作十二蓋字之脫以周書文傳解言文王受命之九年知之也大匡文政解並曰惟十有三祀王在管此亦自文王受命數之蓋克殷之一件事也觀逸周書此二篇於十有三祀言東隅之侯咸受賜于王王乃

旅之以上東隅用大匡順九則八宅六位

孔晁注東隅自殷以東旅

調各使陳其政事也

又言管蔡開宗循禁九慝昭九行濟九醜尊

九德止九過務九勝傾九戒固九守順九典

孔晁注管蔡二叔開

其宗族循鎬京之政言從化也

是時安民和衆政事具張於是訪道箕

子適邁盛事豈非開剏之初雖日不暇給規摹宏遠者

乎若夫文王稱王見魯詩及古文尙書說易書春秋緯

雖未可信然文王受命則詩書屢言之逸周書明書文

王受命之九年此亦一確證也豈得爲誣改元則諸侯

自於其國各稱元年春秋列國紀年及汲冢竹書魏惠

王有後元年莫不皆然何足爲異觀兵一節宋人亦力

辨其虛不知武王既可伐紂何以必不可觀兵豈伐紂
爲順天應人而觀兵還歸不遠伐紂轉爲逆天違人乎
此等曲說誠不可解學者論百當一掃其謬見迂談勿
徇于童而習之之言元入爲主不肯變而服義從善也

孟獻子二士考

劉向新序六刺奢篇孟獻子聘於晉韓宣子觴之三徒
鐘石之懸不移而具獻子曰富哉家宣子曰子之家與
我孰富獻子曰吾甚貧惟有二士曰顏回茲無靈者使
吾邦家安平百姓協和惟此二者耳宣子曰彼君子也
以養賢爲富我鄙人也以鐘石金玉爲富孔子曰孟獻
子之富可著於春秋矣按孟子言獻子有友五人樂正
表牧仲其三人則予忘之此所稱顏回茲無靈疑在五
人之數新序雜採諸子其言若可信而獻子卒於魯襄
公十九年顏子少孔子三十歲則時不相及將毋魯有

兩曾參亦有兩顏回與

女吳考

孟子言齊景公涕出而女於吳注者不詳案說苑十三權謀篇齊景公以其子妻闔廬送諸郊泣曰余死不女見高夢子曰齊負海而縣山縱不能全收天下誰干我君愛則勿行公曰余有齊國之固不能以令諸侯又不能聽是生亂也寡人聞之不能令則莫若從且夫吳若蜂蠆然不棄毒於人則不靜余恐棄毒於我也遂遣之此說景公涕出而女於吳之事也越絕書卷二外傳記吳地傳齊門云闔廬伐齊大克取齊王子爲質子爲造齊門置于水海虛二臺在車道左水海右去縣七十里

齊女思其國死葬虞西山吳越春秋卷二闔閭內傳第四吳破楚復謀伐齊齊侯使女爲質於吳吳王因爲太子波聘齊女女少思齊日夜號泣因乃爲病闔閭乃起北門名曰望齊門令女往遊其上女思不止病日益甚乃至殂落女曰令死者有知必葬我於虞山之顛以望齊國闔閭傷之正如其言乃葬虞山之顛是時太子亦病而死此皆齊女女吳之證參觀諸書可以得其顛末

雅樂四曲韶武二舞攷

晉書樂志曰魏武平荊州獲漢雅樂郎河南杜夔能識舊法使創定雅樂又曰杜夔傳舊雅樂四曲一曰鹿鳴二曰騶虞三曰伐檀四曰文王皆古聲詞及太和中左延年改夔騶虞伐檀文二三曲更自作聲節其名雖存而聲實異惟因夔鹿鳴全不改易每正旦大會太尉奉璧羣后行禮東廂雅樂常作者是也後又改三篇之行禮詩第一曰於赫篇詠武帝聲節與古鹿鳴同第二曰巍巍篇詠文帝用延年所改騶虞聲第三曰洋洋篇詠明帝用延年所改文王聲第四曰復用鹿鳴鹿鳴之聲

重用而除古伐檀及晉初食舉亦用鹿鳴至泰始五年
荀勗云鹿鳴以宴嘉賓無取於朝乃取鹿鳴舊歌更作
行禮詩四篇壽祺案漢書藝文志樂家有雅歌詩四篇
夔所傳四曲當卽此文選注引琴操曰古琴有詩歌五
曲曰鹿鳴伐檀騶虞鵲巢白駒然則夔所傳四曲亦琴
曲也鹿鳴騶虞伐檀文王至魏初猶存鹿鳴至晉初猶
存班固言漢興制氏以雅樂聲律世在樂官頗能記其
鏗將鼓舞夔蓋有所受之而宋書樂志載漢大樂食舉
十三曲惟一曰鹿鳴爲古詞則其餘雅歌不盡用也
漢書禮樂志曰高祖廟奏文始五行之舞文始舞者本

舜招舞也高祖六年更名曰文始五行舞者本周舞也
秦始皇二十六年更名曰五行宋書樂志魏文帝黃初
二年改文始曰大韶舞五行曰大武舞明帝太和初公
卿奏太祖武皇帝樂宜曰武始之舞高祖文皇帝樂宜
曰咸熙之舞南齊書樂志晉傳云六代舞歌有虞韶舞
辭有武舞辭宋孝建初朝議以凱容舞爲韶舞宣烈舞
爲武舞宣烈卽是古之大武凱容本舜韶舞也宋志又
曰晉武帝太始二年改制郊廟歌其樂舞仍舊九年荀
勗知樂事使郭夏晉書作郭瓊宋識造正德大豫之舞勗及
張華傳云又各造此舞歌詞晉書樂志曰咸寧元年廟

樂傳宣武宣文二舞而同用正德大豫二舞宣武宣文者宋志魏改漢巴渝舞曰昭武舞晉又改魏昭武舞曰宣武舞羽籥舞曰宣文舞案晉志魏武始咸熙章斌三舞皆執羽籥則宣文舞卽武始咸熙卽韶武始卽武也周存六代之樂至秦惟餘韶武而已然歷漢魏晉初其樂譜皆相承用不造新曲自荀勗等競勗舞詞咸宣用之而廢宣文韶武遂亡故宋志載晉舞曲獨多宋之凱容宣烈雖仿韶武而撰立新歌齊志前舞後舞並錄宋王韶之舊詞則非韶武古樂之遺矣嗚乎惜哉

家語觀周篇辨

禮記樂記正義引馬昭謂家語王肅增加漢書藝文志載孔子家語二十七卷師古注曰非今所有家語也以今家語爲出王肅手其說始發自馬昭而唐儒孔穎達顏師古從之今學者灼然皆知其僞仁和孫頤穀志祖作家語疏證取家語之文見於周秦兩漢諸子傳記者指摘無遺以著其剽竊之實善矣然孔子家語不知亡於何時它書絕無徵引其與肅所撰異同若何自來無有能辨之者余讀春秋左氏傳序正義引沈氏云嚴氏春秋引觀周篇云孔子將脩春秋與左丘明乘如周觀

書於周史歸而脩春秋之經。上明爲之傳。共爲表裏。按嚴氏者。公羊先師嚴彭祖。觀周篇者。今家語有此篇名。在第十一。而其文與此不類。然則嚴氏所引。乃真孔子家語之一篇也。王肅猶見真家語篇目。故依仿爲之。數千年疑案。獲一左驗。爲之大快。執此以斷真贋之跡。瞭如矣。

公羊傳徐氏疏

公羊傳徐氏疏或以爲唐之徐彥或疑爲陳隋間人案
公羊傳文公二年疏解云諸侯七虞以下雜記文云云
之說具左氏傳疏今檢左氏傳僖三十三年孔穎達正
義有引雜記及士虞記說虞禮之文徐氏稱之似其人
在孔氏後然隋書經籍志有春秋公羊疏十二卷列公
羊諸家之末而不著其名經典釋文敘錄有梁東宮學
士沈文何撰春秋左氏義疏闕下秩陳東宮學士王元
規續成之隋志文何作文阿義疏作義畧孔穎達春秋正義序言爲義
疏者則有沈文何蘇寬劉炫今奉勅刪定據劉爲本其

有疎漏以沈氏補焉然則文二年正義說虞禮文蓋取
之沈劉公羊疏所稱左氏傳疏或指沈劉之書又不得
以是斷徐氏爲唐人矣